

ASO GAFUA, 13 MATI 2023

Na nofoia e le Fofoga Fetalai le Nofoa i le itula e 9:28 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taualumaga a le Fono Aoao Faitulafono.

E faafeiloai atu i le paia o le Palemene i lenei taeao fou i le afio o lau Afioga i le Sui Palemia, le paia o le Aiga Kapeneta, faapea a outou Afioga i Minisita Lagolago.

Afio foi le Taitai o le Itu Agai ma sui usufono uma o le tatou Palemene. Tatou te faafetaia le alofa tulituliloa o le Atua ua mafai ai ona momoli mai lo outou soifua ma so matou ola, o lea ua tatou toe fesilafai mo le faaauuina o tatou galuega. Malo le usu, malo le soifua manuia.

E faatalofa atu foi i Ofisa Sili o Pulega o Matagaluega ma Faalapotopotoga Tumaoti a lo tatou Malo ua mafai ona tatou faatasi i lenei taeao. Malo le lagi e mama.

E i ai foi le talitonuga ua maleifua mai i le lagi e mama ma le soifua manuia le paia o si o tatou atunuu i ona tulaga faalupelupeina. E faatalofa atu lau Palemene i lenei taeao.

E faatalofa atu foi i a outou Afioga i Minisita, o lea ua matau atu ua afifio mai sa tuua foi le tatou Palemene ona o nisi o fonotaga, malo le soifua malo foi le lagi e mama, faafetai le usufono.

A o le i see atu mo le tatou Galuega e tusa o Pepa o Galuega, e i ai lava si mataupu e fia afea i se upu a le Fofoga Fetalai mo le tausiga o le aloaia ma le mamalu o le Palemene. Ua ou molimauina i nisi o faasalalau i le faaiuga o le vaiaso na tea nei se faatalanoaga a se tasi o le au faasalalau ma le Afioga i le Taitai o le Itu Agai. E le taugofie ia te au o le Fofoga Fetalai ni faaupuga e faapea, e maumau la le taimi i Fono a le Palemene na fai. O itu ou te liolio i ai, o le avesese i le faafofoga a le atunuu ina ne i faapea mai le atunuu, e leai se aoga ma e maumau le taimi i le tatou Fono lea e fai. E tatou te silafia uma lava, o le Taitai o le Itu Agai, o le tofiga a le Palemene. Sa i ai lava le talitonuga e tausolomua i le Taitai o le Itu Agai ona puipui le mamalu o le Palemene. E ui e le o ia na saunoa i upu ia, ae o ana saunoaga na mafua ai ona lafo e lea tusitala upu ia.

Mo le silafia e le mamalu o le tatou Maota, o lea lava na saunoa le toatele i a tatou taualumaga i le vaiaso ua tuanai, o Lipoti Faaletausaga ia e talanoaina, o Lipoti a le Paeaiga na se i mavae atu nei. O lea foi tatou te mautinoa, sa tatau ona faamaea galuega ia i le Paeaiga lea na tea atu nei, peitai, e leai se mea na faia i ai, ma e atagia ai le faamatala i le matafaioi sa tatau ona faatino. O lea la ua taumafai le tatou Paeaiga ua i ai nei Lona 17 e tagofia galuega e tatau ona iloilo ma o lea ua faagasolo i se faiga e aupito sili ona manino. Ou te lapataia le tatou Maota, aveese le faaupuga lea e faapea o se faiga faapolokiki lea e faatino ai le galuega o lo o taumafai nei.

Ua leva ona ou tau matau i le faasologa o le faatinoga lea o le galuega mai Paeaiga ua tuanai, ma ua ou iloa ai, o le Paeaiga Lona 12 seia oo mai i le Paeaiga Lona 14, sa na o Lipoti a Komiti na iloiloaina ma faamaonia ona tuu atu lea i le Malo e tali mai ai. E le i iloiloaina ni Tali a le Malo e le Maota i lena taimi. O le Paeaiga foi lea 14 e oo mai i le 15 na amata ai ona folasia na o fautuaga a Komiti, e le i folasiaina ni sailiiliga a Komiti. O lau vaai i ai, e le i manino le faafofoga a le atunuu i le atoaga o galuega sa feagai ma Komiti Faa-Palemene.

O le Paeaiga Lona 16 lea na se i mavae atu nei, e le i iloiloaina manino faapea ni Lipoti a Komiti ma Tali a le Malo. E ave Lipoti a Komiti e tali mai ai le Malo ona aumai lea o Tali a le Malo ma tufatufa i sui usufono, seiloga lava e tuuina mai se fesili tusitusia a se sui usufono e faatatau i Tali a le Malo ona faatoa maua lea o le avanoa e fesili ai pe a iloilo Lipoti a Komiti ma Tali a le Malo. E le saausi foi se saunoaga a sea sui usufono e pei o le faiga lea ua tatou faia ai nei. O lena foi faiga, afai lava e leai se sui usufono e tuuina mai se fesili tusitusia i se Tali a le Malo, e leai lava se avanoa e saunoa ai so o se sui usufono i Lipoti ma Tali a le Malo. Se i silasila le tatou Maota o lea ua manino tatou Lipoti ma Tali a le Malo i le faasologa lea ua tatou faia nei. Ia manatua foi, e le faapumoooina le faiga o le tatou galuega, tulou le faafofoga a Samoa, e tatau ona manino le faafofoga mai a le atunuu i iloiloga ma faaiuga tatou te faia. E le itiiti tupe o lo o faaalu i galuega a Komiti, e fai o taumafataga, o le faatupeina o asiasiga i Savaii, i pasese, o penisini o taavale, totogi o faletalimalo, a o le faatupeina foi o alauni o Komiti. Ae a faafofoga mai a le atunuu i tuuaiga faapea e leai se aoga o le Fono o lo o fai nei, ona lagona ai lava lea o le faanoanoa. E le faigofie ia te au o le Fofoga Fetalai le galuega fita o lo o feagai ma le Komiti. O le matafaioi mataitu lea a le Palemene o lea e faatino e ana Komiti Faa-Palemene. Afai e oo mai Lipoti i le Maota, e tatau ona matua soalaupule ma iloilo lelei. E tatau ona silafia uma e usugafono uma a le atunuu o lo o i totonu o le Palemene lenei, e tatau foi ona manino mai ai le faafofoga a le Atua pe o faapefea ona alo lo tatou vaa i le va feagai ai ma le faigamalo.

E toe tatalo atu ai le tatou Maota, afai e le tapena le sui usufono i mataupu ua talanoaina, lafo pea le avanoa i sui usufono o lo o manatu mamafa i le

valaauina, ae soia ia le saunoa tuulafoai faapea e leai se aoga o le galuega o lo o fai nei. E leai se felafolafoaiga i le mataupu lea, a o le tiute lea o i tatou uma o le puipui i le mamalu o le Palemene. Manuia le tatou Fono i lenei taeao.

Tofa Hon Lauofo Fonotoe Nuafesili Pierre Lauofo (Taitai o le Itu Agai): Lau Afioga i le Fofoga Fetalai pe maua sina avanoa. E faamalulu atu ai i lau Afioga e tusa ai ma lau saunoaga i lenei taeao. O lea ua aumai manino lava e lau Afioga, e le o ni upu a au o upu a le Tusitala la na lafo mai, ae sa ou tali i ai, o le tele ia o le taua o le galuega. Ae a silasila lava i ai i le interview, o le tele ia o le taua o le galuega na fai i le vaiaso na tea nei, ua malamalama ai ma silafia ai i galuega o lo o faatino i totonu o faalapotopotoga.

A o le upu lava ia lea e saunoa ai lau Afioga, ona e pei ua ou matau atu o le a tuuai mai ia au ae le o se upu a au ae le o se upu a au. O le upu a le Tusitala na lafo mai na fai mai i lana fesili. Ia ae ou te le i tali i ai faapea e sao ia pe a, e leai. Na pau lava lau tali, e taua le galuega ua faatino ona ua malamalama ai le faafofoga mai a le atunuu i galuega ia e faatino e le aufaigaluega a le Malo. Ia o lau tali lena, a toe silasila lelei lava i le interview, o la e manino lava. Ia a o lea foi e aumai manino i lau saunoaga, leai o le fesili mai a le... ae le o se upu a au faamolemole. Ma le faaaloalo. Ae faamalulu atu ai pe afai ua faamanualia ai lou finagalo i lea tulaga.

FOFOGA FETALAI: Faafetai. Ia o le uiga lava lea o le tatou nonofo ai i totonu o le Palemene. E ao lava ona tatou sailiili mamalu. Pau lava le mea ia manino foi le atunuu, aemaise lava le au tusitala, ia latou manion foi i le tatou galuega o lo o faia nei. O le mea lea, o lea lava e manino lau tala, e le o lau Afioga e ona le tala, ae ua mafua foi ona fesili le tusitala, ia ai o atagia i au saunoaga le tatou galuega. Ae afai o lou finagalo lea o lea ua e saunoa manino i luma o le Palemene, ia, tatou faapena ona fai. O le tiute lava ia o le Fofoga Fetalai, e le mafai ona tuua se mea ua lagona e le Fofoga Fetalai aua lava le manuia auiluma aemaise le faafofoga mai a le atunuu.

TUUINA ATU O PEPA

Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).

1. P.P.2022/2023 Nu.173, Tali a le Malo i le P.P.2022/2023 Nu.94, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2021/2022 Nu.23, Lipoti

Faaletausaga a le Ofisa o le Loia Sili mo le Tausaga Faaletupe
2019/2020.
Ma le faaaloalo lau Afioga.

ILOILOGA O LIPOTI A KOMITI FAA-PALEMENE MA TALI A LE MALO

**P.P.2022/2023 NU.23, LIPOTI A LE KOMITI O TUPE MAUA MA
TUPE TOTOGI I LE P.P.2020/2021 NU.104 & P.P.2021/2022 NU.37,
LIPOTI FAALETAUSAGA A FALETUPE O LE ATINA'E O
SAMOA MO TAUSAGA FAALETUPE 2019/2020 & 2020/2021**

**P.P.2022/2023 NU.62, TALI A LE MALO I LE P.P.2022/2023 NU.23, LIPOTI
A LE KOMITI O TUPE MAUA MA TUPE TOTOGI I LE P.P.2020/2021
NU.104 MA LE P.P.2021/2022 NU.37, LIPOTI FAALETAUSAGA A LE
FALETUPE O LE ATINA'E O SAMOA MO TAUSAGA FAALETUPE
2019/2020 & 2020/2021 – ILOILOGA**

FOFOGA FETALAI: Tulai mai lau Afioga i le Taitaifono o le Komiti o
Tupe Maua ma Tupe Totogi.

**Afioga FALEOMAVAEGA TITIMAEA TAFUA (Taitaifono Komiti o
Tupe Maua ma Tupe Totogi):** Faafetai mo lou avanoa lau Afioga i le
Fofoga Fetalai.

Ia gafua ia le amataga o le vaiaso fou ma ona lavasiga ae faamalo le
agasoifua ma le agalelei faasoa mai o le Tama i le Lagi i lau Afioga i le
Fofoga Fetalai o le Maota ona ua momoli mai lou soifua ma le lagi e mama
ae a le mamalu i lau Palemene, i le afio o lau Afioga i le Sui Palemia,
Minisita o lau Kapeneta, le afifio o Minisita Lagolago.

Liliu ane i lea Itu i le afio o lau Afioga i le Taitai o le Itu Agai ma sui
usufono mamalu uma o le Palemene o le Fonousu a Samoa.

Afifio foi Ofisa Sili o Pulega o Matagaluega a le Malo, ae a
Faalapotopotoga Tumaoti. O le faafofogaaga a Samoa i tupu ma tamalii i
soo se tafa o lenei lalolagi, ae a le paia o Samoa ua potopoto i le susu o lau
Susuga i le faafeagaiga tau i lagi ma lou faletua, malo le soifua, malo le
tapuai faafetai tatalo. E malo foi mo le taulaga siitia i lenei taeao, e momolia
i luga o Fatafaitaulaga ma tumau ai le viiga ia te ia.

Lau afioga i le Fofoga Fetalai, ua ou tulai atu ma le agaga faaaloalo e faatu
le lafo, *Ina ia faamaonia e le Fono Aoa le Lipoti a le Komiti o Tupe Maua
ma Tupe Totogi o lo o tuuina atu ai ana Sailiiliga ma ana Iugafono.*

Ma le faaaloalo lava.

Faaluaina e le sui usufono mamalu mo Lefaga ma Faleaseela, sui usufono mo Vaisigano 1 ma le sui usufono mo Faasaleleaga 2.

Na faamaonia le lafo.

FOFOGA FETALAI: Ou te tapa lau afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

Afioga FALEOMAVAEGA TITIMAEA TAFUA: E faafetai i lau Afioga i le Fofoga Fetalai.

Aotelega o sailiiliga a le Komiti:

O le Faletupe o le Atinae o Samoa na faavaeina i le Tualfono Autu, Development Bank Act 1974, ma sa toe teuteuina i le 2010, ina ia faatulaga manino ma lelei ai matafaioi totino, core functions, e lagolago ai atinae o pisinisi tumaoti e aofia ai faatoaga, faiga faiva, fai lafu manu ma isi atinae.

O faiga faavae ua faataatia nei e pei o teuteuga o le Tulafono 2010, ua faatauaina ai le tuuina atu o faaunegatupe mo pisinisi tau tagata tafafao maimoa mai fafo, o pisinisi laiti, faapea foi le faatauua ua ave nei i le auaifaatoaga (SACEP/Farming & Fisheries) a le atunuu.

Galuega Ausia 2019/2020 & 2020/2021:

Na faamauina e le Komiti e ui i aafiaga na feagai ai le atunuu i faamai e le gata o le misela i le faaiuga o le 2019, ae o le ogaoga o aafiaga o le Komiti-19 na mulimuli mai. Peitai, o lo o tulaga lelei taumafaiga a le Faletupe. E tumau pea le talitonuga o le Faletupe o Atinae o le a siitia le auaunaga ma galuega faatino i le isi 12 masina o lumanai. O lo o saga faamausali foi lenei fuafuaga mamao i le i ai pea o le faamalumaluga a le Malo, e ala i fesoasoani tuusao i tausaga taitasi.

E \$2 miliona le fesoasoani faamama-avega a le Malo e fesoasoani ai i pisinisi ua maualalo tupe e aoina mai ai e aofia ai totogi o lisi mo pisinisi tumaoti o lo o nofo totogi i le DBS faatasi ai ma le fesoasoani i tului o nonogatupe. E taua ona faamauina e le Komiti le tulaga o nonogatupe tuua ua le gafatia ona totogi, po o i ai se fuafuaga e faamalosia ai nei pisinisi e toe totogi a latou aitalafu ua silia ma le 6 masina, e le i toe faamauina se vaegatupe ua totogi. Na faamaonia e le Komiti o le vaitau lenei ua le toe faafaigofie ona o le ogaoga o aafiaga o le faamai, ae o lo o faagasolo faatalatalanoaga ma pisinisi o lo o nofo aitalafu i le Faletupe. E le o faamalosia lea tulaga, seia vagana ua toe faafoi le faatulai mai o pisinisi i se tulaga sologa manuia ma toe tatala femalagaiga ona toe faia lea i ai o se isi fetuunaiga, ae mo le taimi nei e le

i faapafalaina ae o lo o tuu avanoa pea seia toe faafoi fefaatauaiga faapisinisi i tulaga sa i ai a o le i aliae le faamai.

Na faamauina e le Komiti le taua o la latou auaunaga faamama-avega, e ui e le o faamauina se siitaga tele i tupe maua ae o le agaga faafetai o le Komiti o lo o mafai lava ona tuu atu le tauau e lagolago ai i atinae a tagata lautele, o le atunuu, faapea ma Pisinisi o lo o tau atiae. O le itu taua, ia tuuina atu le fesoasoani faanonogatupe ae ia gafatia ona totogi faatasi ai ma tului. Na faamaonia e le Komiti o lo o tulaga lelei le totogiina o nonogatupe a le Faletupe o Atinae i atunuu mamao. O lo o lelei ona matauina a latou nonogatupe mo le tausia o taimi faatulagaina mo le totogiina o nonogatupe, e alofia ai le tele o tului i luga o paleni totogi.

Aotelega o tupe maua ma tupe faaalu.

I le lipoti faaletausaga 2019/2020, e \$9.4 miliona tupe maua a le faletupe, ae \$7.1 miliona ana tupe faaalu. I le lipoti faaletausaga 2020/2021 na faamauina ai tupe maua e \$5.5 miliona, ae \$6.4 miliona tupe faaalu.

Fautuaga 1:

E fautuaina e le Komiti le Faletupe o Atinae, ina ia mataitu lelei nonogatupe a tagata taitoatasi ma pisinisi e le o toe gafatia le totogiina, ae o lo o tuuavanoa pea i ai, e tulituliloa ina ia totogiina a latou paleni tuua, pe a toe sologa manuia tulaga o le tamaoaiga pe a tatala vavao, ina nei manatu o se alofaga ae ia faamaea le totogina o nonogatupe tuua.

Fautuaga 2:

E fautuaina e le Komiti le Faletupe, ina ia silasila i se faatinoga e mafai ai ona taofi ni faamanuiaga tau tupe o lo o maua i faamanuiaga a le Malo (Stimulus Package) e totogi atu i pisinisi aemaise o faletalimalo ina ia totogi ai paleni tuua i nonogatupe i le Faletupe.

Fautuaga 3:

E fautuaina e le Komiti le Faletupe o Atinae ina ia silasila i auala e galulue soosootauau ai ma le Matagaluega o Tupe i faamanuiaga totogi atu i pisinisi, ina ia fai se fua tai 50% e totogi ai nonogatupe tuua, ae faamatuu atu i ai le isi 50% e faaauau ai pea atinae.

Fautuaga 4:

E fautuaina e le Komiti le Faletupe o Atinae, ina ia faaauau pea ona tuuina atu le faamama-avega i tului o nonogatupe mo tagata o lo o faaogaina le auaunaga a le faletupe, e tele ai foi tagata e tosina e faatino ni a latou nonogatupe i le Faletupe o Atinae.

Iugafono:

I le maea ai o iloiloga a le Komiti na faaiugafonoina ai e fautuaina ai le Fono Aoao Faitulafono ina ia faamaonia le, *P.P.2020/2021 Nu.104, Lipoti Faaletausaga a le Faletupe o Atinae o Samoa mo le Tausaga Faaletupe 2019/2020 & P.P.2021/2022 Nu.37, Lipoti Faaletausaga a le Faletupe o Atinae o Samoa mo le Tausaga Faaletupe 2020/2021.*

Ma le faaaloalo lava.

FOFOGA FETALAI: Ia malo faafetai i le saunoaga malamalama a lau afioga i le Taitaifono i Sailiiliga ma Fautuaga ma Iugafono a la outou Komiti, aua le tatou Faletupe o Atinae, malo faafetai. Malo galulue. Ou te tapa lau afioga i le Minisita o le Faletupe o Atinae, lau afioga Hon Mulipola Anarosa Ale Molioo, manuia le malaga manuia. Ua tatou feiloai i lenei taeao fou. Malo lava.

Susuga Hon MULIPOLA ANAROSA ALE MOLIOO (Minisita o le Faletupe o Atinae): E faafetai i lau afioga i le Fofoga Fetalai. E faatalofa atu foi i lau afioga aemaise foi o le afioga i le Sui Palemia, le saofaiga i Minisita o le Kapeneta, o le Taitai o le Itu Agai ma le paia o le tatou Palemene ma Samoa ua potopoto, ua faamalo le soifua.

Lau afioga i le Fofoga Fetalai, ou te tolaulauina le tali a le Malo e faatatau i fautuaga a le Komiti o Tupe Maua ma Tupe Totogi. E pei ona folasia manino nei e le Taitaifono, e pei o lea na faailo e le Taitaifono e fa fautuaga na tuuina mai e tusa ai o le latou iloiloga. Ou te fiafia e toe faailoa atu ia tatou Fautuaga ia e 4, aemaise foi o tali a lo tatou Malo.

Fautuaga 1:

E fautuaina e le Komiti le Faletupe o Atinae, ina ia mataitu lelei nonogatupe a tagata taitoatasi ma pisinisi e le o toe gafatia le totogiina, ae o lo o tuu avanoa pea i ai, e tulituliloa ina ia totogina a latou paleni tuua pe a toe sologa manuia le tulaga o le tamaoaiga pe a tatala vavao, ina nei mantu o se alofaga ae ia faamaea le totogiina o nonogatupe tuua.

Tali a le Malo:

Ua faamauina le fautuaga a le Komiti mamalu. O lo o mataitu e le Faletupe fesoasoani faamama-avega o lo o faamatuu atu i tagata taitoatasi ma pisinisi e fesoasoani ai i aafiaga o le Koviti-19. O lo o faamuamua e le Faletupe le tulituliloa o tupe totogi mo nonogatupe ma tupe tuua ina ia mautinoa le totogiina e siitia ai tupe maua ma le tulaga lelei o nonogatupe faamauina.

Fautuaga 2:

E fautuaina e le Komiti le Faletupe ina ia silasila i se faatinoga e mafai ai ona taofi ni faamanuiaga tau tupe o lo o maua i faamanuiaga a le Malo (Stimulus Package) e totogi atu i pisinisi aemaise faletalimalo ina ia totogi ai paleni tuua o nonogatupe i le Faletupe.

Tali a le Malo:

Ua faamauina le fautuaga a le Komiti mamalu. Ua tuuina atu le talosaga a le Faletupe i le Malo ina ia vavae ese se vaega o faamanuiaga tau tupe (stimulus package) e totogi ai tupe tuua ma faitiitia paleni o nongatupe a pisinisi ma faletalimalo o lo o faamauina nonogatupe i le faletupe.

Fautuaga 3:

E fautuaina e le Komiti le Faletupe o Atinae, ina ia silasila i se auala e galulue soosootauau ai ma le Matagaluega o Tupe i faamanuiaga totogi atu i pisinisi, ina ia fai se fua tai 50% e totogi ai nonogatupe tuua, ae faamatuu atu i ai le isi 50% e faaauau ai pea atinae.

Tali a le Malo:

Ua faamauina e le Faletupe le fautuaga a le Komiti mamalu ina ia talosagaina le Matagaluega o Tupe e vavae ese le 50% o faamanuiaga tau tupe mai i fesoasoani a le Malo e totogi ai tupe tuua ma faaitiitia paleni o nonogatupe a pisinisi ma faletalimalo o lo o faamauina i le Faletupe.

Fautuaga 4:

E fautuaina e le Komiti le Faletupe o Atinae, ina ia faaauau pea ona tuuina atu le faamama-avega i tului o nonogatupe mo tagata o lo o faaaogaina le auaunaga a le Faletupe, e tele ai foi tagata e tosina e faatino ni a latou nonogatupe i le Faletupe o Atinae.

Tali a le Malo:

O tului a le Faletupe o lo o faamauina e pito i maualalo pe a faatusatusa i isi faletupe. O lo o faaauau pea le faamama-avega i tului tauala mai i fesoasoani a le Malo ina ia siitia ai avanoa mo tatou tagata e fai ai nonogatupe i le Faletupe mo Atinae.

Lau afioga i le Fofoga Fetalai, e tuuina atu ma le faaaloalo tele.

FOFOGA FETALAI: Ia malo saunao i lau afioga i le Minisita o Faletupe o Atinae mo le tali manino foi a lo tatou Malo e tusa o fautuaga a le Komiti. Ua maua le avanoa o le tatou Maota i se sui usufono e fia saunao, e tusa o le lipoti ma le tali a le tatou Malo.

Tulai mai lau afioga i le Taitai o le Itu Agai.

Tofa Hon LAUOFO FONOTOE NUAFESILI PIERRE LAUOFO: E faafetai i lau afioga i le Fofoga Fetalai, ua tatou i ai faatasi ma lau afioga i lenei taeao i le taulaga foi ua siitia. Ua faamalo foi maleifua mai i lenei taeao fou i le faaauauina o le tatou galuega. Ia faapea foi le tapuai mai o le tatou atunuu, ia faamalo i la outou tapuaiga. E le faagaloina foi le tapuaiga a le Itupa paia, o lo o faanonomanu aua se manuia o nei ma a taeao.

E faapea foi le Itupa o le aufaigaluega a le malo, le afitio i Afioga i Ofisa Sili o Pulega a le Malo, i le latou foi taupati mai, ia faamalo le galulue faamalo le lagolagosua i le galuega a le tatou Palemene, aua o le tatou sa e fautele.

I lenei taeao lau afioga i le Fofoga Fetalai, e faatalofa atu foi i le faafeagaiga ma le faletua ua tatou faatasi i lenei taeao, e tapuaia le tatou galuega.

Ia faamalo faafetai ua toe aulia mai lenei taeao fou ua momoli mai e le Atua lo outou soifua faapea foi so matou foi ola e taumafai ai le tatou galuega. Ia ae le uma lava le fia tulai atu pea lau Afioga e pei foi o le la vaiaso e faaali nai manatu ona o le taua tele o lenei galuega e le mafai ona tuua i lalo, pe faauiufia tulaga, ia ma momoli foi ma faamau se faafetai i aufaigaluega a le Malo aemaise o Ofisa Sili o Pulega o Matagaluega ma Pulega i le latou foi fitaituga i galuega e pei ona valaauina ai i latou e le Atua.

Lau Afioga i le Fofoga Fetalai na matauina i le tatou Lipoti Faaletausaga a le Faletupe o Atina'e, e tele lava le loan portfolio a le tatou Faalapotopotoga po o le tatou Faletupe lea, e \$141 miliona sa i ai i lena foi vaitau, o tupe ua nono atu i tua mo atinae. Ae pau lava le vaega lea e pei e matauina i lau vaai e tataua lava ona oo foi i ai sina fautuaga i lenei taeao, ona o lea e matau atu e 67% o nonogatupe ia e avatu i tua o lo o ave i mea o faletalimalo, faletalimalo ia, ae o faletalimalo na o le 2% o latou o lo o nono i le faletupe, ae 67% o le tupe a le faletupe o la e nono atu. O le ala faaletonu lena o le mea lea e tau tilotilo atu i ai, ona o faletalimalo ia sa aafia tele i le Koviti-19 ma le faamai. Ia o lea la pei ua tau faaletonu ai le vaitaimi lea pei ona matauina i le Lipoti Faaletausaga a le Faletupe o Atina'e. Ae pei e tau i ai se manatu foi lea e silasila le tatou Malo i se faiga foi lea e aveese mai mea o nonogatupe ia a faletalimalo mai le Faletupe o Atina'e. E i ai se isi vaega faapitoa, po o se vaega faapitoa a le Ofisa o Turisi, po o se isi Faalapotopotoga po o se vaega o le UTOS po o fea e tuu i ai nonogatupe ia mo faletalimalo, ona ua afaina tele le Faletupe o Atina'e, ae faaavanoa tupe ia mo atinae foi ia a nai tagata lautele, aemaise lava la mea tau faatoaga, i tulaga tau faatoaga, aua o lo o manaomia foi e latou le aufaifaatoaga ma isi pisinisi laiti fesoasoani mai tupe ia. Ae silasila pe i ai se faiga e tuuese ai faletalimalo ona o faletalimalo e fai si tetele tele o nogatupe e manaomia e

latou ma avatu ai lava le tele o tupe a le tatou Faletupe o Atina'e ae pei o le a le tele se vaegatupe e faaavanoa mo nai atinae laiti.

Lau Afioga i le Fofoga Fetalai, ia e na o le pau lena o se manatu e tulai atu ai ona o lea e matau atu e i ai le tulaga lea o lo o tulai mai i le tatou Faletupe o Atina'e ma le faaaloalo.

Ia manuia lenei aso Fono.

FOFOGA FETALAI: Malo faafetai mo fautuaga, o lea ua faafogafoga mai foi le Minisita ma le Taitaifono aemaise foi o le Pulega o le Faletupe o le Atina'e aua le agai i luma o lea foi Faalapotopotoga taua a le tatou atunuu.

Ia, ua avanoa le tatou Maota mo se tasi o sui usufono e fia saunoa. Ia, se i tulai mai lau Afioga i le sui usufono mamalu mo Satupaitea.

Afioga Hon LAUTAFI FIO SELAFI PURCELL (Satupaitea): Faafetai i lau Afioga i le Fofoga Fetalai. E faaopoopo lava le faafetai i le tatou taulaga siitia ua e siitia i lenei taeao fou.

Ia a o le i faia foi se tala a Satupaitea, e muamua lava ona faatulou ma faatalofa i le pau o le tatou Maota nei, i le afio o lena itu o le Sui Palemia ma le Kapeneta, tainane foi le mamalu o Minisita Lagolago ma le Sui Fofoga Fetalai, ia ma lenei foi itu i le afio atu o le Taitai o le Itu Agai ma sui usufono mamalu uma o le Palemene nei.

E faatalofa atu foi i a tatou malo o lo o tatou faatasi i lenei taeao, ua maua o le faafeagaiga ma lona faletua. Faamalo le taputapu mai ma le faatasi mai foi i lenei aso e molimauina foi galuega a le Fonotaga.

E faatalofa i Taitai o tatou Matagaluega, faamalo lava. Ua alu lena vaiaso o tatou faatasi, ia ua tuua galuega i Ofisa ae ua outou afifio mai. Faamalo lava le onosai.

Ua ou tulai atu lau Afioga, ae ou te le i alu ese ou te faatalofa atu lava i si ou itumalo o lo o faalogologo mai. E faatalofa atu ia Satupaitea, aemaise o si a matou Komiti Faafae. Ia o se taimi o i luma tatou feiloa ae faamalo lava i lo outou taputapu mai i se manatu o le tatou itumalo i Fonotaga a le Palemene nei.

Ua ou tulai atu lau Afioga, o mea lava nei ou te tilotilo au i ai i Lipoti nei, 2019/2020, 2020/2021, o lea ua atagia mai i i, e ave lava lau faamalo i Matagaluega. O le taimi lava lenei pei ona ou fai atu e i ai foi isi foi tatou Lipoti sa talanoaina, o tausaga sili ia ona faigata, tausaga ia na tulai mai ai le faamai o le Misela, sau loa ma le Koviti-19, aemaise la le Matagaluega lenei o le Faletupe o Atina'e. Ona silasia foi pei foi ona saunoa le sui usufono mamalu, i le tele o pasene o i latou ia i tupe lea e alu i atinae ia o faletalimalo, sosoo atu ai ma faatoaga. O atinae lava nei e silisili ona aafia i le tulai mai o le Koviti-19, na matua faaleaogaina uma lava tupe maua mai, aemaise lava le Turisi. A o lea lava e matau i le faaiuga o le tausaga lea 2019/2020 faapea

foi le 2020/2021, o lea lava e molimauina le maua o tupe. O lea foi na molimauina e le Komiti le latou faamalo i le lelei pulea ma le lelei o le faagaoioiga o le portfolio foi a lea Matagaluega, e ui i le faigata sa i ai, a o lea lava e matau e le Komiti e leai o la e sa lelei lava.

Faamalo atu i le pulega foi i lea tausaga, ae talosia o lea foi a tatou faitau atu i isi lipoti, ia faaaau ai pea. Ae afai e mafai ona outou galulue i taimi silisili ia ona faigata, a o lea e tulai mai o se Pulega e lelei le faafoeina o tupe ma lelei foi le fuafuaina o galuega fai. Ia o le a le mea o le a le mafai ai isi tausaga i tua pe a toe foi le tatou atunuu i le toafilemu i le uma atu o le faamai?

O le isi vaega lea ou te fia tautala i ai lau Afioga o lea foi e manino mai i le Lipoti a le Komiti, o le suesuega lea a le Komiti e uiga i nogatupe tuua, ua faigata le totogi. A o le faamatalaga lea e sau a le Matagaluega, ona o le taimi lenei o lo o faigata lava le olaga o tagata Samoa e faipisinisi ona o le faamai, ma o lea sa tuuavanao i ai. O se mea lena e maualuga i lou sui usufono lau Afioga, e i ai taimi e sousou ai le tatou faigamalaga, e i ai taimi e saogalemu ai. A o le taimi la e sousou ai, ia o ai a tua i ai tagata o le tatou atunuu ma faiga pisinisi? O i i faletupe nei. Afai la e le fetuutuunai le manatu o le faletupe, ia o lona uiga, e oti lava nai, se i tulou nai pisinisi laiti ia e tau le lava se tupe e fuafua ai a latou galuega pe afai o le a le maua atu se nonogatupe. Ae faafetai. O le uta lava a le potu ia e fetalai, a vaai atu ua faafaigata le olaga ona o se mea ua tulai mai, tuu avanoa i o tatou tagata, aua o i ia e le faapea o fea a o i ai o tatou tagata nei, e tumau pea i Samoa, tatou te toe foi lava foi i ai. O latou foi nei a toe lelei le tamaoaiga, e toe tulai mai lava e toe galulue aua le atinae o Samoa. O le mea lea ou te faafetai atu ai i le Pulega, faafetai atu foi i le Komiti i lo latou manatu malamalama i tali a le Matagaluega, e tuuavanao i nai tagata.

O lo o i ai fautuaga lau Afioga i le Taitaifono. E i ai fautuaga ia faapea e vaai i faamanuiaga foi nei o stimulus package ona aveese mai lea e totogi ai nogatupe a i latou ia ua faaletonu a latou nogatupe ua le mafai ona totogi, o taimi faigata nei. E le auai la lou sui usufono i le manatu lea lau Afioga. Ou te le auai i le tulaga lea. E ese lava le agaga na fai ai le stimulus package, e ese le agaga, ina ia faagaoioi ai nai pisinisi la ua alu atu lava i lalo, o le a tauau lava ina le mafai ona ola, they are struggling to survive. O le mea lena na fai ai le stimulus package. E ese la le agaga o le stimulus package ia, ese le faiga o aitalafu ia ua le mafai ona totogi, o mea na a le Matagaluega e o latou e... ae aua le aumaia fua le faamanuiaga na avatu e le Malo, the spirit na avatu ai le stimulus package, lea o le a aumai e totogi ai le loan, ae oti atu ai lava lea o le pisinisi ua le mafai ona totogi nai tagata faigaluega la e faigaluega lava ua tau le maua ni totogi. O le aoga lena o le stimulus package lau Afioga na avatu ai, ae le o le se i mai ona ave lea e totogi ai tupe, o tupe a le tatou Malo lea o le a toe aumai tupe a le avatu e le Malo i o toe aumai e

totogi atu ai tupe a le... o le mea lena e le auai ai lou manatu i le... Se i toe silasila i ai. Afai lava o isi tausaga lea ua sau i luma mai, ia talosia o i ai se tulaga faapena, a o le mea lena... E manaia le fautuaga lea le 50% lea la o ituaiga tulaga la na, aumai lava na o se vaega pe afai lava e aumai. A o le agaga i le stimulus package, e ese mai lava i le mea lea o le totogiina o aitalafu ma loan lau Afioga i le Fofoga Fetalai.

Ia o nai manatu lava na, o nai manatu e tapue ai foi le tatou Fonotaga i lenei taeao. E i ai lava nai isi manatu, ae ou te lagona o le auga atoa lava o le momoli o le faafetai i le Matagaluega, o le taimi faigata, ae o lea lava na outou tulai mai e tauave le tatou Matagaluega. Tele tagata o le tatou atunuu o lo o faamoemoe ia te outou, tagata tau atia'e, tagata limavaivai, a o i ina lea e tua atu i ai.

Ia manuia tele lau Afioga i le Fofoga Fetalai, manuia le tatou Fonotaga i lenei taeao. Soifua.

FOFOGA FETALAI: Faafetai. Malo saunoa i le sui usufono mamalu. Faafetai foi mo fautuaga o lea ua faafogafoga mai le Afioga i le Minisita ma le Taitaifono, o le a silasila foi i ai e tusa o fautuaga.

Ia, se i tulai mai lau Afioga i le sui usufono mo Vaisigano 1.

Afioga NIUAVA ETI L. MALOLO (Vaisigano 1): Faafetai i lau Afioga i le Fofoga Fetalai ua maua foi le agaga faatalofa i le paia foi o le Palemene ua potu i lenei taeao. E manatu o le a tatou see i lou sa e pei ona e tatala le lagi ma faanoinoi foi i le agaga o le Atua e faatasi foi i taulumaga o le Palemene. E faatalofa foi i sui mamalu o Ofisa Sili o Pulega o le tatou Malo, aemaise foi o auauna tofofi a le Atua ua tatou potu i lenei taeao.

Lau Afioga i le Fofoga Fetalai ua ou tu atu e manatu lava i taimi o fautuaga aua e pei e manino lelei le tulaga o Lipoti o lo o faapea ona iloiloaina, o Lipoti ua maea, ae aoga foi i le tatou tata i le liu i lenei taeao e tapu'e ai foi finagalo o le faigamalo ua faapea ona tofofi i lenei tausaga ma lenei Paeaiga e faufau ai so latou finagalo i le agai i luma o le tatou Palemene ma le tatou atunuu i tulaga e pei ona faataoto i lenei taeao.

O le manino ia o core functions a le Faletupe e pei ona faataoto mai i le Lipoti. Faafetai foi i le afioga i le Ofisa Sili o Pulega aemaise foi o le Pulega o le Matagaluega, ua manatu e le faigofie la outou galuega sa outou fetaii i taimi faigata, ae manatu e tele foi se lesona sa outou maua mai taimi faigata e pei ona afatia ai lo tatou atunuu i tulaga i faamai ma le afaina o le tamaoaiga. O core functions a le Matagaluega e pei ona faataoto o lo o manino. O lo o manino mai foi le suiga pei ona faatulaga mai le 2010 e pei ona toe faamatuu atu ai nai vaegatupe ia mo le aufaipisinisi. O i ina lea e tau agai atu ai se fesili lau Afioga i le Taitaifono. O le tulaga foi lea o le aofaiga

o nonogatupe e tuuina atu po o le a le max, po o le a le tele o le nonogatupe e mafai ona tuuina, ae matauina i totonu o le Lipoti...

Ou te faaluaaina le finagalo o le Afioga i le Taitai o le Itu Agai, o le taumafai e tuuese se vaega ina ia tuu i ai tatou pisinisi nei, ina ia aua ne i afaina ai le auaunaga a le Matagaluega. E agai se faamatalaga I se tasi foi o nonogatupe sa tuuina atu foi e se tasi o faletalimalo i totonu o le tatou atunuu nei, e le leaga le finagalo na faataoto ai. Manatu o se tofa foi na lelei ona tapena ae tatou te le faitau foi ma fuafuaga a le Silisiliese e pei ona i ai o i ina lea popole i ai le taofi \$53 miliona e pei ona tuuina atu i se tasi foi o faletalimalo o lene lea agai ai le lagona. O le a le tele o le nonogatupe tuuina atu i faletalimalo, e pei e taua i lo'u ia sui usufono ina ia mafai ona malamalama le tatou atunuu i le tulaga o lo o i ai le taimi lea ma se vaega foi e tuu i ai faletalimalo nei, ina ia aua nei toe afaina le tulaga foi i galuega a lea foi Matagaluega. E pei e fesoasoani tele i le aufailafumanu aufaifaiva ma isi atinae, e atinae ai le atunuu ae pei e na afaina ona o nai vaega ia.

O se manatu lea ae lagolagoina faafetai lau Afioga i le Taitaifono, aemaise foi le Komiti mamalu mo le Lipoti tapena maeaea lelei. Faafetai lau Afioga i le Fofoga Fetalai.

FOFOGA FETALAI: Malo saunoa lau Afioga i le sui usufono mamalu mai Vaisigano 1 po o lau Afioga foi i le Minisita Lagolago o Galuega Tetele a le tatou Malo mo le faaso. O lea foi ua avanoa le tatou Maota mo se tasi o sui usufono e fia saunoa. Lea ua matau atu e leai se isi e fia saunoa se i tulai mai lau Afioga i le Taitaifono mo Tali foi o nisi o mataupu sa laga e sui usufono mamalu o le Palemene.

Afioga FALEOMAVAEGA TITIMAEA TAFUA: Faafetai lau Afioga i le Fofoga Fetalai mo le avanoa. A o le i amata atu se tali e tusa ai o fautuaga a le Afioga i le Taitai o le Itu Agai, se i muamua lava ona avatu si faasaoga lea lau Afioga i se tasi o sui faasalasalau na aveseseina iuga o tali na ou faia mo fesili a le Afioga i le Taitai o le Itu Agai i le tatou \$300 foi lea one off. O lea na aumai i luga o le upega faasalalau a le tatou 2AP e le mafai e le Malo ona faatino lea tulaga. Mo le faasaoga o le tulaga lea lau Afioga, ou te le i tali atu e le mafai e le Malo. O le tali na ou tuuina atu e sese le taimi na tuuina mai ai lau fautuaga ae ua avesese i luga o le tatou... leaga o la e faafofoga Samoa e lelei ona faasao faamatalaga nei e avesese. E fautuaina ai le uso lea na te faia ia faasalalauga ia se i tautuana fai faasao lelei ia faasalalauga ma se i tau tuu le taufaaleaga.

E momoli atu le faamalo i lau Afioga i le Taitai o le Itu Agai e tusa ai ma fautuaga. Manaia fautuaga malo faafetai. O le tulaga a e i ai o fautuaga lelei lau Afioga ua tuuina mai o le a faapena ona tilotilo ma tagatagai i ai le Afioga

i le Ofisa Sili o Pulega ma le Matagaluega aua le agai i luma o le tulaga i le lelei o atinae o si o tatou atunuu malo faafetai.

Faamalo foi lau Afioga Lautafi mo le fautuaga manaia faatasi ma si au... na foi e tuu mai e lau Afioga le tai 50% lea e te le o faamalieina ai lou finagalo. Mo le silafia e le mamalu o le tatou fonotaga nei, o le mafuaaga na... Sa faatalatalanoa ma le Afioga i le Ofisa Sili o Pulega ma le mamalu o le Ofisa sa matou faatalanoaina le tulaga lea. O le mafuaaga na fai ai le tulaga lea ona o le matau i le tele o tupe na faapena ona tuuina atu i faletupe. Oi i faletalimalo leai latou te le i faatinoina se galuega faapea e tau improve a latou Hotels leai se mea tasi na faia i tupe lea na avatu ai e le Malo, faatasi ai e le o tuua foi se vaegatupe i latou nonogatupe na faatino. E pei o le mafuaaga lena ua tilotilo ai le Komiti e fai se faiga ina ia faapaleni ai ave na o le 50% aua o lea e vaai atu e le o i ai se mea... e le o i ai se atagia o aliali mai ai le faatinoina o seleni na avatu i tatou Faletalimalo e pei o se tali lea lau Afioga e faamanino ai le vaega o lo o atugalua ai lou finagalo lau Afioga.

O le fesili a lau Afioga Niuava, o lo o... malo faafetai mo fautuaga, ae o si tali atu i le nonogatupe ia e te fesiligia po o lea le max o tatou nonogatupe ia e faatino. O le tulaga i mea o nonogatupe ia faletalimalo, e pei e faalagolago lava le tupe nono i le... e pei o mea masani i le value o lau aseta po o le hotel ma tilotilo ma tagatagai foi i le tulaga e mafai ona service le loan. E pei e faapena le tulaga o lo o i ai.

O le mea tau atinae uma o tatou turisi, e 69% e umia e le Turisi, ae 31% o atinae o Faatoaga, Faiga Faiva ma isi pisinisi ma Agafesootai. I le faatulagaina o le 85% o atinae tetele ae 35% o atinae feololo po o atinae laiti e pei o le faatulaga lena o le tatou... e pei o le tali atu i faafesili a lau Afioga sui mamalu Afioga Niuava faatasi ai ma le faaleoina o le faamalo ma le faafetai e tusa ai ma fesoasoani na tuuina mai i fautuaga aua le atinae ma le lelei o si tatou atunuu. Faafetai lau Afioga i le Fofoga Fetalai.

FOFOGA FETALAI: Se i tulai mai lau Afioga i le sui usufono mo Satupaitea leaga lea ua... po o ua faamalieina lou finagalo.

Afioga Hon LAUTAFI FIO SELAFI PURCELL (Satupaitea): Faafetai lau Afioga i le Fofoga Fetalai. Faafetai atu i lau Afioga i le Taitaifono leai ua ou toe tulai atu e faasao atu lou manatu na avatu. E leai ou te le teena le mea lea o le 50% o le fautuaga lona 3 lena lea ua aveese le 50% i mo faamanuiaga foi ia a le Malo lea e ave i ai e ese mai i le stimulus package. O le mea lea e tau ese ai sou manatu o le fautuaga lona 2 lea faapea e taofi le tupe lea na avatu i le Stimulus Package ae ave e totogi ai le loan. A o lea ua toe tilotilo atu i Tali o le Malo, pei o lea ua maua mai i le Tali a le Malo le mea tonu lea e faapea e i ai se vaega o le tupe lena stimulus package e mafai ona ave ae le avea uma pei o le mea lena sa tulai mai ai se manatu pei

o lea e sau fautuaga e aua nei avea se faamanuiaga o le stimulus package i tagata ia ae aumai uma e ave totogi ai le loan. A o le 50% lea, ou te auai ae a faapena foi la le faiga o le stimulus package pei o lea ua tau maua mai i le Tali o le Malo ia e faamalieina foi lou sui. Ma le faaaloalo lau Afioga.

FOFOGA FETALAI: Malo faafetai atonu o lea ua.. Ia se i tulai mai lau Afioga i le Taitaifono.

Afioga FALEOMAVAEGA TITIMAEA TAFUA: Malo faafetai faafetai lava i lau Afioga e pei a ona ou faafetai atu i fautuaga lelei talia ma le fiafia faafetai lava.

FOFOGA FETALAI: Malo faafetai. Ia se i tulai mai lau Afioga i le Minisita o le Faletupe o Atinae pe i ai se mea fia saunoa iai po ua faamalieina le mea foi sa finagalo ai le tatou Maota.

Susuga Hon MULIPOLA ANAROSA ALE MOLIOO: Faafetai i lau Afioga i le Fofoga Fetalai. E talitonu foi o lena ua maea faamanino foi e le Afioga i le Taitaifono o le Komiti nisi o tali e pei ona fesiligia foi e lena itu o le Maota aemaise foi o lenei itu. Tau lava ina faamanino nisi o vaega e pei ona fesiligia e le Afioga i le sui usufono mai Vaisigano Nu 01 o le taua fesili lea ua tuuina mai poo a faiga faavae a le tatou Faletupe e tuuina atu ai se tupe se nonogatupe tele. Atonu o faiga faavae a ia a le tatou Faletupe o Atinae e le tatau ona ova atu ai i le 20%, peitai ane o le tatou nonogatupe lea e pei ona taua e se tasi foi o faletalimalo e ova atu i le 20% o le tatou portfolio lea e i ai le tatou vaega tupe lea. Atonu foi o nisi foi o vaega taua ia e tagatagai ai foi le faigamalo lenei i nisi o vaega e tatau pea ona savalia pea alafua ma faiga faavae e tatau ona faatinoina ai. E pei foi ona malie foi i saunoaga a le Afioga foi i le Taitai o le Itu Agai po o a ni auala e mafai ai ona aveese mai tatou nonogatupe ia. Atonu o se tasi lena o taumafaiga foi sa ave iai foi le faatalatalanoaga ma le tatou Faletupe o Atinae, ona e tulai mai le tatou Faigamalo ia e fai a sina mole o le tatou Faletupe i le tele o tatou nonogatupe o lo o i ai i le taimi lenei i tatou nonogatupe o Faletalimalo. O se atinae taua peitai ane ua iai foi luitau o le tatou faamai ma nisi foi o faafitauli. Lea ua matau ai ua tele ona le gafatia foi e le tatou Faletalimalo ia ma tau saili ai lava ni vaega e tatau ai ona tau ave sao a le faamuamua a le tatou Faletupe o Atinae i e e tatau ona ave i ai le faamuamua i tulaga lea o le atinaeina o tatou Faatoaga ma le tele o nisi atinae. A ua matau atu ua tele ina lilifa i tatou Faletalimalo ae taua fautuaga ua tuuina mai, aua lava le tapenaga o le tatou safolau mo le agai i luma. Ia pau ia o nisi o vaega lau Afioga i le Fofoga Fetalai.

FOFOGA FETALAI: Malo saunoa lau Afioga i le Minisita o Faletupe o Atinae, ma aua foi nei galo i sui mamalu na lagalaga ia Faletalimalo o loo manino a i le Vaega 5 o le Tulafono o Faletupe o Atinae ia tulaga ia atonu lea foi ua aoga le folasaga a le Tamaitai Minisita ma le Pulega atonu aua seiloga e sui muamua le tulafono ona faataunuu ai lea o nisi o fautuaga ae malo faafetai. Ou te tapa lau Afioga i le Taitaifono mo le lafo.

Afioga FALEOMAVAEGA TITIMAEA TAFUA: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao le P.P 2022/2023 ,Nu 23 Lipoti a le Komiti o Tupe Maua ma Tupe Totogi P.P 2020/2021 Nu 104 ma le P.P 2021/2022 Nu37 Lipoti Faaletausaga a Faletupe o le Atinae o Samoa mo le Tausaga Faaletupe 2019/2020 ma le tausaga 2020/2021.*

Faaluaina e le sui usufono mamalu mai Lefaga ma Faleaseela ma le sui usufono mai Vaisigano Nu 01

Na faamaonia le lafo.

FOFOGA FETALAI: Ou te tapa lau Afioga i le Minisita mo le lafo o le Tali o le Malo.

Susuga Hon MULIPOLA ANAROSA ALE MOLIOO (Minisita o Faletupe o Atinae a Samo): Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao a le Malo fautuaga a le Komiti o Tupe Maua ma Tupe Totogi e pei ona ou tolaulauina atu.*

Faalua e le Minisita o le Soifua Maloloina ma le Minsita o Leoleo ma Falepuipui, Pulega o Tinei Mu ma Faalavelave Tutupu Faafuasei.

Na faamaonia le Tali a le Malo.

P.P.2022/2023 NU.35 LIPOTI A LE KOMITI O LE VAEGA TAU LE VA FEALOAI I LE P.P.2020/2021 NU.63 LIPOTI FAALETAUSAGA A LE FAALAPOTOPOTOGA FAAVAE TAU FATUGAO O SAMOA MO LE TAUSAGA FAALETUPE 2019/2020

P.P.2022/2023 NU.83, TALI A LE MALO I LE P.P 2022/2023 NU.35 LIPOTI A LE KOMITI O LE VAEGA TAU LE VA FEALOAI I LE P.P.2020/2021 NU.63 LIPOTI FAALETAUSAGA A LE FAALAPOTOPOTOGA FAAVAE TAU FATUGAO O SAMOA MO LE TAUSAGA FAALETUPE 2019/2020.

FOFOGA FETALAI: Tulai mai lau Afioga i le Taitaifono Komiti o le Vaega Tau le Va Fealoai .

Afioga LAUMATIAMANU RINGO M. PURCELL (Taitaifono Komiti o Vaega Tau le Va Fealoai): Lau Afioga i le Fofoga Fetalai, ou te faatu le lafo, *Ina ia faamaonia e le Fono Aoao le lipoti a le Komiti a le Vaega Tau le Va Fealoai i ana Sailiiliga o Fautuaga ma Iugafono.*

Faaluaina e le sui usufono mo Vaisigano 1, sui usufono mo Gagaemauga 2 ma le sui usufono mo Aana Alofi 1.

Na faamaonia le lafo.

FOFOGA FETALAI: Ou te tapa lau afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

Afioga LAUMATIAMANU RINGO M. PURCELL: Avea ia lenei avanoa i lenei taeao e faatalofa atu ai i lau afioga i le Fofoga Fetalai, faafetai mo le taulaga siitia i lenei taeao. E momoli foi le agaga faafetai i le faatalofa i le Sui Palemia aemaise o Minisita o le Kapeneta, aemaise foi le vasega o Minisita Lagolago.

E faatalofa foi i lenei Itu o le Malu, lau afioga i le Taitai o le Itu Agai, ma sui usufono mamalu uma o le Palemene. E faatalofa foi i Ofisa Sili o Pulega o Matagaluega aemaise foi o Faalapotopotoga Tumaoti. E iai foi se auauna a le Atua o lo o tatou mafuta i lenei taeao, e faapena ona faatalofa i lenei taeao i le tatou mafutaga.

Ae ou te tulai lava ma le faaaloalo e folasia aotelega o sailiiliga a le Komiti o le Vaega Tau le Va Fealoai i le P.P.2020/2021 Nu 63, Lipoti Faaletausaga a le Faalapotopotoga Faavae Tau Fatugao a Samoa mo le Tausaga Faaletupe 2019/2020.

Taualumaga:

Na amata taualumaga a le Komiti i le feiloaiga ma le Faalapotopotoga NKF i le aso 11 o Me 2022. Na auai le afioga i le Ofisa Sili o Pulega ma le Faalapotopotoga e folasia le aotelega o galuega faatino sa gapatia ai i le tausaga faaletupe 2019/2020.

Aotelega o Sailiiliga:

Ootoga o galuega faatino:

O le Faalapotopotoga Tau Fatugao a Samoa, sa faatuina i le tausaga 2005. Ona o le taua o le auaunaga e tatau ona i ai i le atunuu. Ua faamauina ana matafaioi autu, e pei ona aiaia i le Tulafono o le Faalapotopotoga Faavae

Tau Fatugao 2005. (i) O le tuuina atu o le auaunaga tau togafitiga faamama toto. (ii) O le faaitiitia o le faatupulaia o gasegase e afua ai le leaga o fatugao. (iii) O le tuuina atu o faamatalaga ma aoaoga mo le soifua maloloina lelei o fatugao.

Ua taulai galuega ina ia ausia lana tofa mamao o le tuuina atu o auauna sili ona lelei mo le soifua maloloina o fatugao mo Samoa. Aemaise ai le anavatau ia galulue gauai i le faaitiitia ai le faatupulaia o gasegase tau fatugao, o le faaititita faafuaseia ona aafia fatugao, atoa ai ma le faaauauina o le tuuina atu o se auaunaga sili mo le togafitiga o tagata ua maua i gasegase tau fatugao.

Lau Afioga i le Fofoga Fetalai ma le mamalu o lenei Maota, e pei ona folasia i le lipoti a le Komiti le atoaga o ana sailiiliga.

Galuega faatino na mafai ona folasia ma luitau sa feagai ma le Faalapotopotoga e pei ona tatou matauina o le tausaga faaletupe na feagai ai le atunuu ma le lalolagi ma le faamai o le Koviti-19. I sailiiliga a le Komiti o faamatalaga o tupe a le Faalapotopotoga na mafai ona tuuina mai, le lipoti a le ofisa o le Pule ma Suetusi Sili, ma ua aofia ai tupe maua ma tupe faaalu a le Faalapotopotoga NKF. E \$7.8 miliona tupe maua a le Faalapotopotoga i le tausaga faaletupe 2019/2020. E \$7.4 miliona tupe faaalu a le Faalapotopotoga mo ana auaunaga e pei ona folasia e le lipoti a le Komiti.

Asiasiga a le Komiti:

Lau afioga i le Fofoga Fetalai, e pei ona silafia e le maualuga o lenei Maota le isi matafaiioi a Komiti faale-Palemene, o le faatautaia o asiasiga oversight. Na asia e le Komiti le aso 12 Iulai 2022 le Maota gasegase tuai ma le nofoaga fou e pei ona i ai i le taimi nei. E pei ona faamauina i le lipoti a le Komiti atugaluga sa i ai i le nofoaga tuai, aemaise foi o itu na matauina e pei o le auaunaga tuuina i le Ofisa Sili o Pulega ma le aufaigaluega, aemaise foi o masini faapitoa mo le faamamaina o toto o nai o tatou tagata na aafia fatugao.

Na faagasolo le asiasiga a le Komiti i le nofoaga fou ma matauina ai, o se poloketi aoga o le a tali i manaoga sa manaomia e le maota gasegase faamama toto tuai, ma sa molimauina e le Komiti le tautua a le Faalapotopotoga. E 64 ia masini fou, o lo o ua i le fale foi lea ua faaoga i le taimi nei. Sa matauina e le Komiti, ona o le taimi o le asiasiga e le i faaogaina, a o le fale lea na tatala nei e latalata i le faaiuga o le tausaga. Ae o le fale tuai lea sa matou asiasia, e 22 masini sa i ai.

E fa sifi sa vaevaeina i ai, e fa i le lima itula mo le tagata e toatasi e faamama le toto, ae 4 sifi e na o le 18 le aufaigaluega tausua soifua sa maua i le asiasiga a le Komiti. Na faamauina ai foi le faamalo le fai o le faiva i le aufaigaluega.

Itu taua na matauina e le Komiti:

Polokalame faalauiloa mo puipuiga o le aafia o fatugao: Lau afioga i le Fofoga Fetalai, e pei ona maua i sailiiliga a le Matagaluega o le Soifua Maloloina o lo o feagai ma polokalame faalauiloa, public awareness. Ma e ao ona galulue faatasi ma le Faalapotopotoga NKF e uunaia ma faamalositia puipuiga o faamai le pepesi ona o se tasi o mafuaaga e aafia ai patugao, ma oo ai i le faamama toto. E faamauiina lau afioga, e 219 tagatanuu o Samoa, na tuuina atu ai le auaunaga faamama toto. E 48 ia gasegase fou na maua i lea tausaga ma le 60 gasegase asiasi mai i Samoa mai atunuu i fafo, sa tuuina atu i ai le auaunaga.

Ua faamauiina foi i le lipoti a le Komiti le tataua ona aotauina mafaufau o tatou tagata ina ia tausisi i le tausiga o le soifua, aua sa molimau e le Komiti i lana asiasiga le aafia o fatugao ma oo ai i le faamama o le toto.

Tausisi i mea taumafa ma mea tausami mo le soifua maloloina lelei.

E pei ona faamauiina i le lipoti o le iloiloa a le Komiti, i le tulaga lea. Ma o se mafuaaga ua aafia ai i faamai le pepesi, e i ai le mai suka, o le toto maua ia faapea foi le gugu. E manatu le Komiti e ao ona silasila le Soifua o le Maloloina ma le Faalapotopotoga o le NKF, ia le faamalositia o taiala mo le taumafa ma le tausami i vaiinu ma meaai e maua ai le soifua maloloina. Ae ao ona tagai i le amata ona aotauina mai ma faamalositia mai i Aoga Tulagalua ma Kolisi i le faasaina o vaega nei, e faatupulaia ai le tino puta.

Togafitiga faapitoa e ala i fomai ma masini:

Lau afioga i le Fofoga Fetalai, o le asiasiga a le Komiti e pei ona faamauiina, sa manatu ai le vaega lea, i le faatogaina o le nofoaga fou i nisi masini fou mo le tautuaina o tatou tagata. Ua faamauiina foi le lipoti i le vaai o lenei Komiti i le faaauau o faiga paaga ma isi gasegase o Maota gasegase i atunuu i fafo, ma le auaunaga ofoina mai po o fesoasoani tuuina mai mo Samoa.

Ona o itu ua faamauiina ai fautuaga a le Komiti i lana lipoti, ma i le maea ai o iloiloa ma sailiiliga a le Komiti ma e fautuaina ai le Faapotopotoga Tau Faavae Fatugao o Samoa ma le Malo e faapea;

- E fautuaina e le Komiti le Malo ina ia silasila i le faatauina mai o nisi masini faapitoa fou mo le Maota Gasegase Faamama toto fou, ona o lo o matauina le faatupulaia o gasegase tau fatugao mai lea tausaga i lea tausaga.
- E fautuaina e le Komiti le Matagaluega o le Soifua Maloloina, le Matagaluega o Aoga, Taaloga ma Aganuu e galulue faatasi ma le Faalapotopotoga i le faataatitia o ni faiga faavae ina ia tausisia le

soifua maloloina i Aoga Tulagalua ma Kolisi e ala i meaai o lo o faatauina atu mo fanau.

- E fautuaina e le Komiti le Malo ina ia silasila i ni auala e faamalosia ai Taitai o nuu ma afioaga, ekalesia aemaise o matua, ina ia taulamua i gaoioiga ma faafaileleina fanau ina ia taumafa i meaai paleni aemaise le taua o le faamalositino.

Iugafono:

Na faaiugafonoina e le Komiti Faa-Palemene o le Vaega Tau le Va Fealoai, e fautuaina le Fono Aoao Faitulafono ina ia faamaonia ma faautagia lana Lipoti ma Fautuaga i le, *P.P.2020/2021 Nu 63, Lipoti faaletausaga a le Faalapotopotoga Faavae Tau Fatugao a Samoa tausaga faaletupe 2019/2020.*

Ma le faaaloalo lau afioga.

FOFOGA FETALAI: Ia malo faafetai saunoa i lau afiog ai le Taitaifono e tusa ma le tolaulauina o Sailiiliga ma Fautuaga ma le Iugafono a la outou Komiti, O lea foi ua faafofoga le paia o le Maota i tulaga o le galuega sa outou galulue ai, malo faafetai.

Ou te tapa lau afioga i le Soifua Maloloina mo le tali a lo tatou Malo.

Afioga Hon VALASI LUAPITOFANUA TOGAMAGA TAFITO SELESELE (Minisita mo le Soifua Maloloina): Lau afioga i le Fofoga Fetalai, ou te tolaulauina tali a le Malo e faatatau i fautuaga a le Komiti o Vaega Tau le Va Fealoai e pei ona folasia manino nei e le Taitaifono.

FOFOGA FETALAI: Tulai mai lau afioga i le Minisita e faaauau tali a lo tatou Malo.

Afioga Hon VALASI LUAPITOFANUA TOGAMAGA TAFITO SELESELE: Lau afioga i le Fofoga Fetalai, a o le i faia se tala e uiga i tali a le Malo. E momoli le agaga faafetai, o lea lava ua e uia ala o manu i le taeao aua lava le vatapuia o le Atua ma le tatou Palemene. Ua e fagota foi i le tai o Atua i le aso, aemaise le mamalu o lenei Palemene mamalu. A o le i faamaotiina le tali a le Malo, e muamua ona ou faafetai ma momoli le faamalo i le Minisita sa tulai mai i lea vaiata, le afioga i le Minisita o Faimalo Kika Stowers i le 2019 seia oo i le 2020 e pei ona i ai le lipoti, aemaise o le 2021 na faaiuina.

Ua malo faafetai le galue, ou te talitonu e le faigofie tiute ma faiva, ua matauina foi i le pale atu e le faigofie. E afaina loa fatugao o le tagata soifua,

e pau lava le mea ua tulai mai, ua mate le maliu ma le oti. Ae ou te faafetai i lau afioga i le tauaveina o ia tiute mai na vaitau ae o lo o faaauauina pea.

E momoli le faafetai i le Matagaluega po o le Pulega, le Taitaifono, Komiti faafoe aemaise le Ofisa Sili, ma le tatou afaigaluega e le faigofie lo outou tiute, ma outou faiva. Aua a faaletonu loa le fesootaiga o fatugao ma manaoga e pei ona i ai, ua vave lava ona faaletonu le tagata soifua. E le mafai e setagata, ona ia faatautaia ai fuafuaga, po o se poto, ou te talitonu na o le Atua e faaauina lo outou mamalu i tiute ma faiva.

Lau Afioga o le fautuaga muamua a le Komiti:

Fautuaga 1:

E fautuaina e le Komiti le Malo ina ia silasila i le toe fa'atauina mai o nisi masini fa'apitoa fou mo le Maota Gasegase Fa'amama Toto fou, ona o lo o matauina le faatupulaia o gasegase tau fatuga'o mai lea tausaga i lea tausaga.

E faia le fautuaga lea a le Komiti, a ua oo atu foi fautuaga a le Matagaluega aemaise tulaga e pei ona i ai. O lo o ou taulimaina le FK ua uma ona pasia e le Kapeneta i le aso 15 o Fepuari 2023 masini e 30 ina ia mafai ona faoaina ai pe faaoloaina ai le tatou falemai fou. O le aso 19 o Tesema i le tausaga na te'a nei na tatalaina aloaia ai le tatou falemai. Sa amata mai i le taimi o le Afioga ia Faimalotoa, ia ua tulai ma poloka i le taimi o le Koviti-19 ma oo atu loa ua faaauau galuega, aemaise le tulai mai. O lea la na tatala aloaia ma ua siitia i luga o le vaega fou lea i le mea foi lea sa i ai le faletalavai tuai. Ma afai e oo atu i ai lo outou mamalu, ia ua matauina le matagofie ma le lelei atoatoa.

Na pau lava le mea e fia faamanino i le Lipoti ne i mea ua faaseseina faamatalaga. Ou te iloa o se sasi i le faamauina, i le taimi na tatala aloaia ai le fale faamamatoto fou, e 32 masini e le 64, ne i meaane ua aveseina. E 32 masini i le falemai faamamatoto fou lea. A o le 32 masini lea, masalo o se vaitaimi o Me ia Iuni ua taunuu mai, o lo o i le va o le Matagaluega o Tupe le faagaoioiga, a o lea ua pasia e le Kapeneta. O lea e tuuina atu i le Komiti mamalu ma le Taitaifono o lea ua ausia lea fautuaga matagofie. O le 30 la masini lea, o le a atoa ai le 62 masini i le tatou falemai, aemaise foi se i silasila pe i ai nisi masini mo Salafai, ia po o le toe oka mai o ni mea fou mo Salafai i le agai i luma. Ae o lo o manuia lava mea uma e pei ona i ai.

FOFOGA FETALAI: Ua ou vaelupeina le saunoaga a lau Afioga i le Minisita, ou te talitonu foi o lau Matagaluega, tasi lea Matagaluega taua ma e fia faafogafoga foi i ai le mamalu o le atunuu, mo le faagasologa. Ua i ai le manatu o le Nofoa, o le a faaauau lau saunoaga auiliili ma le matagofie pe a tatou taliu mai le tatou malologa o le taeao.

O le mea lea, faataatiaese Galuega a le Fono Aoa mo lana malologa masani o le taeao.

Na faataatiaese Taulumaga a le Fono Aoa Faitulafono mo lana malologa masani i le itula e 10:46 i le taeao ma toe amatalia i le itula e 11:10 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoa Faitulafono.

Faamalo le onosai i le paia o le tatou Palemene, ua matu i fau le taligasua a le tatou Maota. E i ai foi le talitonuga ua maua se faasiligamalos i le paia o le Palemene e faaauau ai le tatou galuega.

E faataatiaese tatou Taulumaga mo le malologa o lo o saunoa le Afioga i le Minisita o le Soifua Maloloina e tolaulau Tali a le Malo i Fautuaga a le Komiti o le Vaega Tau le Va Fealoai. O le mea lea ou te tapa ma le faaaloalo lau Afioga i le Minisita mo le faaauauina o le tolaulauina o Tali a le Malo.

Afioga Hon VALASI LUAPITOFANUA TOOGAMAGA TAFITO SELESELE: Lau Afioga i le Fofoga Fetalai, e momoli le agaga faafetai ua tatou maua leni ituaso, aemaise le paleauau o le taliga o le sua i le tatou Maota mamalu aemaise o sui usufono uma. Malo faafetai.

Ae o le a ou see loa i le Fautuaga 2 a le Komiti.

Fautuaga 2:

E fautuaina e le Komiti le Matagaluega o le Soifua Maloloina, le Matagaluega o Aoga, Ta’aloga ma Aganu’u e galulue fa’atasi ma le Fa’alapotopotoga i le fa’ataatitia o ni faiga faavae ina ia tausisia le soifua maloloina i aoga Tulagalua ma Kolisi e ala i mea’ai o lo o fa’atauina atu i fanau.

O le taua ia o lea fautuaga. Ma o lea ua leva ona faataatitia e le Matagaluega tulaga e pei ona i ai le fautuaga ma e o lo o tulituliloaina ma ia faamalosia. Ae i le taimi nei o lo o ua faagasolo polokalame a le Soifua Maloloina e pei ona outou faafofoga i tala o laufanua o le tatou atunuu, ua amata ona malosi asiasiga i faleaiga se i tulou, aemaise nisi o aoga o lo o latou faaogaina le tele o **taumafa le talafeagai mo le soifua o alo ma fanau. Ia tasi la lea pitolaau, ae faafetai i le Komiti mo le fautuaga o lo o ua i ai fuafuaga a le tatou Matagaluega i ia vaega.**

O le tolu o fautuaga:

Fautuaga 3:

E fautuaina e le Komiti le Malo ina ia silasila i ni auala e fa'amalosia ai Ta'ita'i o nu'u ma afioaga, ekalesia aemaise o matua, ina ia taulamua i gaioiga ma fa'afaiileina fanau ina ia taumafai i mea'ai paleni aemaise le taua o le fa'amalositino.

E taua tele le fautuaga a le Komiti. O lo o i ai polokalame o lo o faagasolo e le Matagaluega e pei ona i ai i na tausaga ua tuanai e taua o le PEN faa-Samoa. O lea polokalame e faatupeina e le World Bank aemaise Niu Sila ma Ausetalia ina ia faaaluina polokalame nei i tua i tatou nuu ma itumalo ina ia taumafai le taumafaiga po o le puipuia atili o faamai le pipisi. Mo le silafia e lenei Maota, o faamai le pipisi nei pei o le toto maualuga, o le suka, o le tele o faamai faapena, e mafua ai ona oo le tagata i le faaletonu o fatuga'o. Mo le silafia e lenei Maota, o lea ua tele itumalo ua kavaina e lea polokalame.

O le agaga o le polokalame, ina ia o atu i tua i nuu ma afioaga, fesootai i pulenuu ma alii ma faipule, aemaise le aufaigaluega paia a le Atua ina ia aoaoina le tele o tatou talavou, aemaise o taitai o nuu ina ia tauave tiute faafomai i tua e pei o le faatausisoifua, e pei o le siakiina o le suka. Aua o le tele lava o mea seiloga lava e siaki le suka faatoa oo le mai po o le tagata i le falemai. A o le mea la lea ua fai e le Matagaluega amata mai lava i na tausaga, o lea lava ua oo le auunaga lenei ina ia train lelei autalavou aemaise foi o Komiti ina ia mafai ona faaauau le fuaina o le suka i tua o le tagata ma'i, faataamilo i totonu o nuu ma itumalo, aemaise foi o le toto maualuga, fuaina o le toto, ia ma lipoti i tatou falemai faaitumalo. Aua o le mea moni lava, o le tele o tagata o la e ua suka ae ua leva ona nofonofo e le siakia le falemai. o le mea moni lena. A o le agaga o le polokalame lea ua faatino ina ia taumafai le tatou atunuu e galulue faatasi ma le Matagaluega ina ia ausia tulaga e pei ona i ai le malosi o le faamamaina o toto ona o fatugao ua faaletonu.

Manatua foi fatugao ma lona tiute i le tino o le faamamaina o le otaota ma le suavai po o le vai mai le toto, ona lafoai lea o le ottaota e ala i feuvai se i tulou le Maota. O lona uiga o matafaioi lea a tagata uma ina ia mafai ona faasoa le tomai lea i tatou nuu i tua ina ia mafai ona tatou puipuia. E tele le mea lea sa fai e le NKF i a latou sailiiliga, e ova i le 600 tagata ua tataua ona omai e faamama le toto. Peitai, e le mafai ona omai na tagata seiavagana ua oo i le mea foi lele, le taimi ua stroke po ua afaina tele ona faatoa oo mai lea, a ua pagatia. Ae i ai auala e mafai ona tapena i ai le Matagaluega ina ia puipuia meamanu o laitiiiti le faaletonu. O le fautuaga lea i le tatou Maota a o faafofoga mai Samoa, o lo o taumafai lava le Matagaluega ina ia faasoa le polokalame lea i nuu i tua, ia o lo o faasolo lava faa-itumalo ma faagasolo i ai gaioiga nei a tausisoifua aemaise le Matagaluega, ina ia mafai ona faasoa

atu le tomai lea, e mafai lava e latou ona fuaina le suka, fuaina le toto, fesootai ma faamaumauga i le tatou falemai itumalo, ia ma lipoti mai i le tatou Matagaluega.

I le taimi nei, ua amata ona faatino a tatou gaoioiga foi po o faamaumauga i luga o tatou fesootaiga electronic system, lea ua amata i le mea lea sa tatalaina nei e tau o le national hearing centre, mea e vaai ai taliga. A outou silasila i ai ma outou oo atu i ai, ua pei lava o la e te alu i Niu Sila e siaki ai ou taliga se i tulou ona o le faipaaga lea a le Matagaluega ma Ausetalia i le faatupeina o ia mea. Ua matua manaia le tulaga e pei ona i ai le vaega.

O le ala lea aua ne i tatou mafaufau e le oo mai ia tatou le ma'i lea o le faaletonu o fatugao. O lea foi ou te fautuaina lau Afioga i le Fofoga Fetalai, le Ofisa o le Fono, aemaise le Minisita e fitoitonu i ai le Fono, se i tau fuafua le faiga o tatou meaa, ua lava a le vai, lava le faguvai ma mea o fruits. A o le mea lea e i ai nei, o faigaai mea a? Ou te fautuaina le Failautusi, i lou tiute faa-Minisita o le Soifua Maloloina, ou te le i ai nei i le aso a? Ma le tele lava o taimi foi nei e aumai le a, a ou vaai e le talafeagai ma le taumafa ona tete lea aua e ma'i ai le tagata. E le avea foi la le faaaloalo ae tupu ai le gasegase a. E le faapea la o faitioina le tapenaga o le fono, e maoae, faafetai le talimalo. A o le agaga sili ona taua, e fautuaina ua lava a le faguvai, ua lava fruits o apu ma mea faapena, ae aua ne i toe faia ni taumafa tetele. E aoga foi e sefe ai le tou paketi.

Ia, o le tali atu lea i le tatou Maota, ma e taua tele. Afai e umi sau tautalaga, sala umi, leaga tasi lenei Matagaluega pe fia miliona tupe e alu ai a le Malo, a ia faasaoina le soifua o tatou tagata. A na leai le fatugao ma le tulaga o le faamamatoto, ou te iloa ua tele tamalii ma soifua maumau o le atunuu. Ae faafetai i le Matagaluega, faafetai i le Pulega, aemaise o lo outou taumafai i le ao ma le po ina ia mafai ona ave le fesoasoani i o tatou tagata. Aua ne i soisoi le sui usufono e le oo i ai i uta i le Maota. O le ala lea o le fausia ia lelei ia mafai ona taoto ai Sula, ia aua ne i... ne i te i ua alu alu faapea, e sao lava Valasi, e sao lava Valasi. O lea ua taumafai le Matagaluega ina ia laalaa i luma le tulaga e pei ona i ai.

Ia, lau Afioga i le Fofoga Fetalai ne i umi ae o le a tali nisi fesili pe a tele ni lauga, ia a leai, o le Lipoti lava lea e lavea ai le 2021 ma le 2019. Ae to le pulou i le Afioga i le Minisita e le o nofo mai le Afioga ia Faimalo, a o lea lava o lo o faaauau. Ou te iloa o le taimi o i ai Faimalo, e le i moe lelei Faimalo. E oo foi ia te au, ou te le moe. E tete'i le Pule Sili ma le aufaigaluega, ua te'i lava ua ou alu atu faataitai ma masini, ua ou iloa foi fai le faapipiina o mea ia i gasegase a. Ia manuia lau Afioga i le Fofoga Fetalai. Faafetai.

FOFOGA FETALAI: Ua faamalo malele, malo saunoa malamalama i lau Afioga i le Tama o le Soifua Maloloina lau Afioga i le Minisita. Ia, ua

taua foi le folasaga a lau Afioga, ua le gata lava i Tali Tusingusia a le tatou Malo, a o lea lava ua faalatele le auaunaga, aemaise foi o le faasooso mai o le tausaga e ana le Lipoti ma lenei vaitaimi, ia o se fesoasoani foi lena i le silafia e le paia o le Maota aemaise foi o le faafogafoga mai a le atunuu. Malo lava i lau Afioga mo le tali manino ma le tali malamalama mo le tatou Maota aemaise foi o le faafogafoga mai o le atunuu, malo a i lau Afioga mo le tali manino ma le tali malamalama mo le tatou Maota, aemaise foi o le faafogafoga mai o le atunuu. O le a foi se tapenaga a le Failautusi ma le Ofisa, o nei le taeao na o le alaisa faaopopo a le koko Samoa o meaai masani a ia ua masani ai lo tatou atunuu. A o le agaga foi leaga o le tele o tatou e iai le fualaaui foi e taumafa e tataui ona fai lelei se tausamiga aua tou fualaaui nei tei ua afaina tele ai lo outou paia ma lo outou mamalu. Ae o lea ua faafogafoga atu le Failautusi ma le Ofisa o lea fuafua foi tatou taumafataga mo le agai i le lumanai, malo lava le saunoa. O le avanoa lenei i le paia i le Maota atonu ua manino mea uma i le saunoga a le Minisita, ia sei tulai mai lau Afioga i le sui mamalu mai Siumu.

Tofa Hon TUUU ANASII LEOTA (Siumu): E momoli atu le faamalo ma le faafetai lau Afioga i le Fofoga i le Fono e fia faatalofa atu foi lau Afioga ma le Paia maualuga o le .Afio lau Afioga i le Sui Palemia ma le mamalu o le aiga Kapeneta aemaise foi i Afioga i Minisita Lagolago. Lea foi e afio le Afioga i le Taitai o le Itu e Agaia le Malo aemaise foi sui Mamalu o le Palemene nei. E faatalaofa atu foi i le Susuga i le Faafeagaiga ma le Faletua. Lau Afioga o le faletua se tasi foi e faasino i lenei Itumalo i le Paia Sa Asomua ma Aiga e Lua ma le tatou Faleupolu. Faafetai o lea ua afio mai ma sei silasila foi i galuega o loo faia i totonu o le tatou Palemene. Faamalo faafetai lau Susuga i le Faafeagaiga ma le Faletua.

Lau Afioga o se Lipoti taua tele lenei lipoti ua aumai ai luma i le maota fono i lenei itula ma lenei aso e lagona a le popole, ma le tulaga foi le vaavaai atu ma le faanoanoa i le faatupulaia o le mamalu o le atunuu ua aafia i lenei faamai o le gasegase lea o le faamamaina o le toto. Ae mafua lea ona ua faaletonu ia fatugao. O le popolega lau Afioga sa manatu faapea na o le au matutua lava a o le mea lea ua vaavaai atu i ai ua oo lava i le tupulaga talavou ua afaina ai o le popolega lena lau Afioga. Ae faafetai Taitaifono ma le Komiti aemaise foi le Afioga i le Minisita o Soifua Maloloina aua lea ua faataatia mai ma faataoto mai ia fautuaga i le tulaga lea i le tatou agai atu lea ia puipuia, aua lau Afioga o le aumaia o masini nei faamama toto o lea ua tatou oo i le togafitiga. Ae manatua foi o upu a le Soifua Maloloina e sili le puipuia nai loo le tau togafitia. Ae faafetai la lea ua aumai tulaga ia o taiala poo fautuaga ia i le mamalu foi o le atunuu i mea ia o faamalositino, o le taumafa tataui. Ae lau Afioga o lenei vaitau a tatou manatu foi i vaitau ua tuanai atu a o faale o lava foi le tamaoiga le faapea mai o le susu o le pata,

fuamoa o mealelei ia i le soifua. A o lea ua aumai foi lenei vaitau lea foi faimai e sa le alaisa, sa le falaoa paepae o upu la lea ua faapea mai ua faasa mai ao poo a la mea o le tali ai le sua a le au inu fualaaui ae faafetai ai lau Afioga i le Minisita aemaise foi le fautuaga ua faataoto mai o le faagasologa lea ua faagasolo ai galuega le Matagaluega i Nuu i tua, a o le tulaga foi la lea i se isi vaega e tatau ona faapopopo atu iai aua o lea ua faagasolo. Ae pei o le mea taua lava lau Afioga o le faia lea o blood test, i le mea lea ou te matauina aua o a'u sa fautuaina e le fomai vaitaimi o le talavou 12 masina ma fai lo'u blood test, le blood test la lea e iloa uma ai lava mea o oe o loo faaletonu ae lea la ua toe tuu mai i le 6 masina e te silafia ai le faaletonu o lou liver, fatugao mea o loo iai lou suka ma meauma faapena ae pei e faapena se fautuaga e fautua atu ai i le mamalu o le atunuu. Aua e iai a le isi lae faapea o lae malosi ae a fai lou blood test lea e tau mai a le iina ua latalata ona faaletonu lou fatugao. O iina la e amata tapena ai foi le silasila i Alii Fomai poo a fautuaga e taofia ai a o lei oo i le tulaga e alu ai e fai le masini lea, aua e iai isi ua ou faalogo i ai ua fautua iai e fai le masini, ae tetee a e tetee a i latou i vaega ia ae pei la lau Afioga. O le mea lea tau tuu atu ai se tuulalo ia i latou ia ua aafia pe ua latalata ina aafia poo loo aafia ai le toto maualuga, fualaaui o le suka ma vaega ia o le cholesterol. O vaega uma na e aafia ai le fatugao, a o le talosaga pe mata o le a se e le afaina le au matutua lea maua fua fualaaui ona o le latou penisione. A o le autalavou lea iai le popolega poo iai se fesoasoani iai i ni latou fualaaui ma mea uma faapena aua o lea ua vaai atu ai e tai 20 ae 30 lea ua aafia tausaga, ae pe mata o lea se silasila i ai a lau Afioga i le Minisita o le Soifua Maloloina o vaega uma ia e tatau ona oo oo iai se silasila foi a lau Afioga ma le Matagaluega. Afai e le o i ai se faamama-avega i fualaaui a i latou ua aafia i le suka ma tulaga uma faapea, atonu e taofiofia ai foi le faatupulaia, ona lea ua matauina o lea o lea toe aumai le isi 30 ae ou te manatu ua ova atu ma le 100 ma ona tupu i latou ua aafia. A o le popolega lenei lau Afioga i le Fofoga Fetalai ma le Maota, ina ia tatou taumafai muamua i le puipuiga, a mafai ona taofiofia i lalo le faatupulaia o le tulaga lea ua tulai mai. A o le popolega lenei momoli atu le faafetai male faamalo i lau Afioga i le Minisita. E talitonu a o lau Afioga lea ua tulai mai i le foe, ou te iloa lava e le o mapu a lau silasila i vaega uma nei aua lava le manuia o si o tatou atunuu. Ae momoli atu le faafetai ma le faamalo i lau Afioga aemaise foi le Taitaifono ma le Komiti foi o loo latou fautua. Ua tuuina mai fautuaga, e taua a ia tatou faataua lo tatou soifua ma so tatou ola ae faataatia nisi o mea e faapopole ai le mafaufau. E momoli atu le faafetai lau Afioga i le Fofoga Fetalai mo le avanoa manuia le Fono.

FOFOGA FETALAI: Malo saunoa faafetai foi mo le faasoa i lau Afioga i le sui usufono mamalu mai Siumu atonu o lea foi ua faafogafoga atu le

Taitaifono aemaise foi le Afioga i le Minisita mo le agai i luma. O le tata foi o tatou fatugao, o le avanoa lea o se tasi o sui usufono e fia saunoa.

Se i tulai mai lau Afioga i le Minsita o Aoga ona tuu atu lea o le avanoa i lau Afioga i le sui usufono mamalu mai Faasaleleaga 5. Tulai mai lau Afioga i le Minsita.

Afioga Hon Seuula Ioane (Minisita mo Aoga, Taaloga ma Aganuu):
Lau Afioga i le Fofoga Fetalai ou te faanoi atu i le Afioga i le Minisita o Soifua Maloloina pe mafai ona ou fesoasoani atu, leaga o le fautuaga a le Komiti e faaipoipo maua ma le Soifua Maloloina ona faataunuu ai lea o ma faiva.

FOFOGA FETALAI: Ia saunoa lau Afioga i le Minisita.

Afioga Hon SEUULA IOANE: Faafetai. Ou te manatua lava i aso ia a o talai atu fonu a le Soifua Maloloina a o ou i tua i le galuega. E iloa loa e le matou Matagaluega o le Soifua Maloloina e ona le fonu, o le leo a lea e lagona “ai foi o le a ai ni tatou popo ma ni tatou esi”. Oi ae moni la ma le faamaoni. O le galuega a lea a le Soifua Maloloina. O la’u vaai i faiaoga i le taimi lenei aemaise a le itupa o tamaitai, ua le gata i le lapopoa ae matua le ola soifua maloloina a ona o le fautuaga 1. Fai mai e tatau i le Soifua Maloloina ma le Matagaluega o Aoaoga ona galulue faatasi mo le tuuina i lalo o le faamoemoe lea o fatugao, lau Afioga ma le Fofoga Fetalai ma le mamalu o le Fonotaga ua leva ona faataamilo ia fuafuaaga a le Matagaluega o Aoga e faasa ai ona taumafa e tamaiti mo mea ia o saimini ma measuamalie i totonu o latou canteen. Sa faamalosia atu foi i le Matagaluega o Aoga e tatau ona i ai se fruit e mafai ona aai e tamaiti mai lea aso i lea aso.

O le manaia ia lau Afioga i le amataga leai ma se aoga e lei usitaia lea mea ae faifai a e oo mai ile taimi lenei ua sii atoa atu a le ulu saimini a le isi ulugalii e ai e tamaiti. O le naunautaiga a le Komiti ia aua nei afaina fatugao, ona aumai lea o le latou fautuaga e toe faatau nisi masini foi ia e faamama toto. Ae ou te iloa e au e taugata ae o le masini taugofie o le toe faapupula atili o le faamoemoe lea o le Matagaluega o le Soifua Maloloina ma le Matagaluega o Aoga, ina ia toe foi tamaiti e aai ma tausasami ia aemaise o tatou tagata i meai maloloina. Lau Afioga i le Fofoga Fetalai o le masina lea na tea nei sa matou auai ai ma nisi Minisita se toatolu i le fonotaga. O le fonotaga e tau o le Early Childhood Development, i lou mafaufau faafiaiaoga na ou alu ma au, o le mea muamua e tatau ona develop o taimaiti o le aoga, o le mafaufau lena sa ia te au.

Na ou mimita a faapea a o le aoga a e tatau ona muamua lau Afioga i le Fofoga Fetalai ma le mamalu o le Fono, e uma ae le Fono e mamao a i lalo le mea e i ai le aoga e lona tolu. A o le mea e numera muamua o le Nutrition,

meaai tatau o le taimi a e tuvae ai le atalii poo le afafine i le lalolagi o le taimi lena e tatau ona tapena ai taumafa tatau, ina ia oo mai le taimi e aoga ai ma avea ma tagata matua tatou te le toe manaomia se masini faamama toto.

E pei o le faasoa atu lea ae mo le taimi nei, ua aoga foi le suesuega a le Komiti e mafai ai ona tilofia ai itu ia e vaavaai iai le Matagaluega o latou la o latou ia. Manuia lau Afioga aemaise fonotaga.

FOFOGA FETALAI: Malo faafetai lau Afioga i le Minisita o Aoga, e tele foi le sao o lau Afioga ma le Matagaluega i le taumafaiga o taumafai ai le tatou Ofisa o Soifua Maloloina aemaise lava o le manatu i alo ma fanau o le atunuu. Ona e pei e toatele lava alo ma fanau o loo i totonu o aoga ae taua tele le saunoaga a lau Afioga i le Minisita, fesoasoani foi i le faamoemoe i le Minisita ma le Matagaluega o le Soifua Maloloina ma le tulaga i fatugao. E faapena ona puipuia ai le mamalu o le atunuu aemaise nai a tatou fanau, o la foi faafofoga mai le Ofisa o Aoga ma le saunoaga a lau Afioga i le Minisita. E taua tele mo le puipuiga lava pei o le mea lea na saunoa mai ai le sui mamalu o Siumu e taua tele le puipuia i lo le togafitia.

Ae mo le silafia e le Palemene, o le Paeiga lona XV na faatino ai le Komiti Faapitoa a le Palemene mo le uunaia o le Soifua Maloloina, lea na asiasi ai aoga uma lava i totonu o le atunuu ina ia taumafai ina ia tafiesea taumafa e pei ona saunoa ai lau Afioga i le Minisita, aua lava le soifua ma ola maloloina o alo ma fanau ma ia faamalosiava lava le uunaia o taumafa mo faulaau aina, ma fualaa suamalie i totonu o aoga. E taua foi lea faatinoga i lea vaitaimi aua lava le puipuiga o alo ma fanau o le atunuu. Malo lava le faasoa, faafetai foi le fesoasoani mai lau Afioga i le Minisita.

Ia se i tulai mai lau Afioga i le sui usufono mamalu mai Faasaleleaga 5.

Afioga PESETA VAIFOU TEVAGAENA (Faasaleleaga 5): E momoli atu le faafetai lau Afioga i le Fofoga Fetalai mo le avanoa o lenei foi Itumalo. E avea foi lenei avanoa e faatalofa atu ai lau Afioga faapea foi le afio o lau Afioga i le Sui Palemia ma le mamalu foi o le Kapeneta, afifio foi Minisita Lagolago faapea foi lenei itu i le afio lau Afioga i le Taitai faapea foi le mamalu o lenei itu atoa o le Maota.

E faatalofa atu foi i Ofisa Sili o Pulega o Matagaluega ua mafai ona tatou faatasi i lenei taeaoa faapea foi le maualuga o le Matagaluega o le Fono Faitulafono. Lau Afioga i le Fofoga Fetalai ua maua lenei avanoa e momoli ai le faafetai a lo'u foi sui usufono i le taua o lenei lipoti lagolagoina lava. Lau afioga i le Fofoga Fetalai, ua maua lenei avanoa e momoli ai le faafetai a lou nei sui usufono i le taua o lenei Lipoti. E lagolagoina lava e lou nei sui usufono le Lipoti a le Komiti. E momoli atu ai le faafetai i le Taitaifono, ia faapena foi ia le Minisita e ana le Matagaluega e ona lenei Tulafono.

Ae lau afioga i le Fofoga Fetalai e tasi lenei o Tulafono, e ese le taua i Tulafono uma ia e talanoaina i le Maota, ona o le Tulafono o lea e aafia ai le soifua ma le ola o tagata uma o si o tatou atunuu. Ae o le agaga o le faafetai, o lea e manino lava i saunoaga e oo i le saunoaga matagofie a le Minisita, o le taumafai lava o le Matagaluega e puipui le soifua ma le ola, e ala foi i le tele o faasalalauga ma le tele o lesona ia e aumai lava i le tele o vaiaso aemaise lava i meataumafa.

O lea ou te manatua o le vaiaso na tea nei sa matamata ai i le TV. Sa ou matamata ai i le Polokalame i le taeao a le afioga i le Ofisa Sili o le Soifua Maloloina. O le taua o lea Polokalame o le tulaga lea i mea tau taumafa. Ia aua o le mea moni lava lau afioga i le Fofoga Fetalai, i lau lava matau e le o le tele o meaai ia e aai ai ia le toatele o tagata i totonu o tatou aiga, lea e tele na aafia ai le soifua ma le ola. Ae o le tele lava o mea taumafa, lea e tele ina tua iai le atunuu i faleaiga iinei i totonu o le taulaga.

Ia aua a silasila foi lau afioga i le tele o le mamalu foi o le atunuu o lea e faatau meaai nei i luma o faleoloa, ia tulou lava. E tele lava o meaai vela e tatou te o atu foi e faatau mai vaeane foi, e tele lava e le ufiufiina meaai ma mea faapena, e fai foi o le feagai ma le pefu o auala ma mea faapena. Ou talitonu lava au ia, e tasi ia o faafitauli o lea e tulai mai, i le tele o meataumafa vela. Ou te talitonu foi e pei ona saunoa le afioga i le Minisita, ia aua o nei lava meaai e tatou te tua iai i le tele o faleaiga, ia e le faapea foi o nei lava ituaiga mo mea o pisinisi, aua e pule lava le faipisinisi po o le a lava le faiga e kuka ai meaai, e pau lava o le mea ia maua le tupe.

Ae o le agaga taua ia te au ona o lea sa saunoa le afioga i le Minisita o lea o le a taumafai ia le Matagaluega, e oo foi i le saunoaga matagofie a le afioga foi i le Ofisa Sili, ina ia taumafai ia se tulaga foi lea e asiasia ai faleaiga nei. O se vaega taua lea, e mataituina ai po o ogatasi ma le saogalemu ia le faavelaina ma le kukaina o taumafa.

O le isi vaega taua lau afioga e pei ona faalogologo atu i fuafuaga a le Matagaluega o le puipuiga lava lea o tagata e toatele i le tele o meaai lava ia tatou te faatauina i faleoloa. Ia aua o le mea moni lava ia lau afioga e pei la o vaemoa tulou. Ua sau isi vaemoa o le mea moni lava ua pei o ni vae o le size 2 isi lapopoa lea ua iai i le taimi nei.

Ia e tasi lava le atunuu o lea ou te iloa na sau ai le moa e na o Amerika. Ou te le iloa lava i le taimi nei, o lau tala lea e fai atu o le matua lapopoa lava o vaemoa lea ua iai. E 5 vaemoa, o le mea toetiiti lava \$30 ma sene le tau. O le mea la lea e fesili ai lou nei sui usufono, se i silasila ifo ia le Matagaluega lea e okaina ia tatou oloa, po o fea e sau ai moa nei? Ia aua leaga o lea e tatou te iloa le maketi lea e sau i Amerika lea e tatou te iloa, e iloa lava i vae o moa. Leaga o lea ua tau le vaai i vaemoa ia tau laiti. E ua iloa e iai foi lava auala e fai e le aufaipisinisi i nisi o atunuu, e tatui iai vailaau ma mea faapena.

Atonu e tasi lea o vaega e silasila iai le Matagaluega, pe le tasi foi lea auala lea ua afaina ai le tele o le soifua. Ia aua o nei mea uma, o togafiti foi a i latou o le aufaipisinisi ina ia vave ai ona faapuputa ia... aemaise lava ia mea nei o faatoaga, le aufai lafumanu ma mea faapena. Se i silasila ifo iai i le tulaga lea ina ia mataitu lelei le tulaga lea ina ia ave iai le faamuamua le puipuiga o le soifua ma le ola.

E momoli lau faafetai i le Pulega o le Matagaluega o le aufaamama toto le afioga i le Alii Pule ma le Pulega, aua e moni lava o le tatou fautuaga, ae o le mea moni lava o le aufaigaluega o lo o faamoemoe iai le Malo ma le atunuu, i le faatinoina o lenei auaunaga e le faigofie. E momoli atu ai lau faafetai. Ou te faafetai foi i lau afioga i le Minisita ona o lea ua maua nisi o tatou masini faamama toto o lea ua taunuu mai.

Ae pau lava lea o si au tuualalo, se i toe silasila ane lava i se isi nofoaga aua ua faatumulia i uta i Motootua. E tele ina le maua se avanoa o appointment o latou ua afaina le soifua i le mai. O le faafitauli lea i lau matau e mafua ona tuai, ona o le... o tatou auala nei ua fai lava si pisi i taimi aemaise o lea ua ae taimi o aoga a alo ma fanau.

Se i toe silasila ifo lava i eleele ia o le Malo e i Vaitele, pe le tataua ona fai ai se isi nofoaga faapitoa, e na o le auaunaga lea, ina ia faigofie ai e i latou ia mai i le itu lea i Sisifo ia ma le agai atu lea i Lefaga. E pei e latalata lena e toe le fetau ma le traffic aua o le mea moni lava e bumper to bumper ia taavale i taeao. O lona uiga, o le faigata ia ona maua appointment o nai tagata i le faatumulia o lea foi ituaiga mai.

Ia ua na o se tuualalo atu lava i le afioga i le Minisita, se i silasila ifo lava, ona o se tulaga faapena lea e tau avatu ai se tuualalo ina ia mafai ona... aua o le isi taimi i lau matau, le taimi e pisi ai le auaunaga lenei, o usugafono foi nei a Ekalesia. Ia aua o le tele lava o faafeagaiga o lea e mamai i le mai foi lea. Ioe, e le sese lau tala lea e fai atu. Ae o le uiga lena o lau faamatalaga e tasi lea fesoasoani a le tatou Malo i se isi nofoaga e tua iai le mamalu o le atunuu.

Ia aua a fua nei i Amerika Samoa, o le matua taugata lava o le auaunaga lenei. Ioe, e le taugofie. E i ai ma'i la e i Amerika Samoa ua omai iinei e togafiti iinei o le taugofie. A o lona uiga, a toe fai se isi nofoaga fou i Vaitele, ou te iloa o se tulaga lelei mo le lumanai.

Ia e pei na pau lea o se vaega lau afioga i le Fofoga Fetalai, e avatu ai se agaga faafetai i lau afioga i le Minisita, aemaise le Pulega ma le Matagaluega i la outou foi auaunaga, aua o le tou auaunaga ia e tua i ai si o tatou atunuu. Ia ma le faaaloalo lava lau afioga i le Fofoga Fetalai.

FOFOGA FETALAI: Malo, faafetai saunoa i lau afioga i le sui usufono mamalu mai Faasaleleaga 5.

Susuga Hon Laauli Leuatea Polataivao Fosi (Minisita mo Faatoaga ma Faiga Faiva): Lau afioga i le Fofoga Fetalai...

FOFOGA FETALAI: O lea foi ua faafofoga atu le afioga i le Minisita i fautuaga foi ua tuuina mai. Ia se i tulai mai lau afioga i le Minisita o Faatoaga ma Faigafaiva.

Susuga Hon LAAULI LEUATEA POLATAIVAO FOSI: Faafetai mo le avanoa. E faatalofa atu foi i le paia ma le mamalu o le tatou Fonotaga i lenei aso. Faamalo atu foi le tapuai i lau afioga i le Fofoga Fetalai ma le tatou Palemene, e ala foi i le toesea ma le atunuu ma le afioga i le Minisita o Siosiomaga ia ona o fonotaga e faataua ai tulaga tau faatoaga ma faigafaiva ma le siosiomaga i tulaga tau folesi.

O lo o alofa tele mai le Palemia o Sitiveni Rambuka ia ma le afioga ia Panimarama, manuia mea uma i le la foi atunuu. Ae o le taua o le mea lea ua ou tulai atu ai, i le ma auai atu ai ma le afioga i le Minisita o le Siosiomaga, o le ma tonu lava lea ua saunoa iai le afioga i le Minisita o le Soifua Maloloina.

O le sao o tulaga tau faatoaga o fua o fualaaui aina ma fualaaui taumafa mata i le faafitauli lea ua momoli mai e le afioga i le Soifua Maloloina le afioga i le Minisita. O lea foi ua e saunoa lau afioga i le Fofoga Fetalai, ioe o le ala lea o le tulai atu leaga sa lalamua le Palemene, le Paeai XV 2010 i le 2015. Sa faatu ai le Komiti Faapitoa e tau o le SPAHGL, e taulamua ai le Minisita o Soifua Maloloina ia Leao Tuitama ma Palanitina Toelupe, a o avea o ia ma Faatonusili. E faapena foi ia le Minisita o Aoga sa iai ma lana ia foi Ofisa Sili o Pulega o le Matagaluega ma le Ofisa o Faatoaga ma le toatele o nisi o Minisita o le Kapeneta. Ae sa taulamua ia le afioga i le Fofoga Fetalai i le taimi lea a o ou Fofoga Fetalai ma ou tulai ai lava e avatu lau tuualalo ma lau vaai iai i le mea na tupu i lenei taimi.

O le savavali a le afioga i le Fofoga Fetalai ma le Palemene i lenei taimi lau afioga, e le i iai se aoga e tasi na misi. E toe lava o Olo ia le sui faavae lea e totoe. Sa matou savavali uma e asiasi uma faleaoga o le atunuu ma matauina ai i lenei vaiata le tele o le tilotilo o le a iai le aafiaga tuga i le lumanai. This is 10 years ago na tupu ai le mataupu lenei. Na matou o atu ai matou vaai i le tele o faaletonu o faleaoga. E matou te taunuu atu tulou lava e matou te taunuu atu i Moataa, tou te silafia le faleaoga fogafale lua lea e tu tonu lava i le corner, tua o le falesa Taiti. E matou te taunuu loa i ina ae pau mai le tamaitiiti mai le fogafale lua e sau mai totou o le fola o le faleaoga.

It was completely demolished, pala le faleaoga, leaga faleletaua ma mea faapena. E le gata la o le faaletonu o faleaoga, ae o meaai la e faatau i le lotoa, ia o lea ua saunoa le afioga i le Minisita o Aoga, o meaai e tupu ai le faamai le pipisi i tupulaga talavou uma o le atunuu.

Sa matou asia foi faleaoga i Salafai o le mea lava lea e tasi. E uma ane ia le asiasiga a le Palemene ma lana Komiti, ua tapuni ia faleaoga e 3. Tapuni Asau, tapuni Palalaua, tapuni ma Tuanai. O le mea lenei o le faaletonu o faleaoga, faaletonu le siosiomaga o faleletaua, toe faaletonu ma mea ia e faatau i totonu o faleaoga, saimini, o mitimiti, o lole, o sukalati ma le tele o meaai e le tatau, e le tatau ona faatauina i totonu o faleaoga.

O le fautuaga na aumai i le Faauluuluga o le Matagaluega ma le Minisita o le Soifua Maloloina i lena taimi, o le tatou augatupulaga lea ua iai tatou nei tulou lava le Maota, ua aafia uma tatou i le Non Communal Disease. O tatou uma nei ua aulai le 50, 60, 70 tausaga, ua tuai ona fai se togafiti mai i le 30, 40 tausaga talu ai leaga ua tatou taumamafa lava i meaai e aafia uma ai tatou. Ma e le natia i le Maota, o tatou uma o lea e tofu ma fualaaui lea e inu. E le o ni upu e toe natia mea na.

Ao le togafiti na fai i le 10, 15 tausaga talu ai, o le auala e foia ai le mataupu lea lau afioga i le Fofoga Fetalai, ae o le mea la sa fai e le Komiti lea, o le o i faleaoga. O le uiga o le o i faleaoga, o tupulaga la e muamua ia latou system, healthy system. E le i oo latou i le loloto o le mea lea ua o tatou oo iai i le aafiaga la lea ua o tatou talanoa iai.

Ia o lea ua saunoa nei le afioga i le Minisita o Soifua Maloloina ua faaopoopo isi masini e 30. Lau afioga i le Fofoga Fetalai e le o le tali lena o le faafitauli lenei. The answer is not to upgrade our Dialysis System leai, o lau tuualalo lau afioga i le Fofoga Fetalai ma le mamalu o le Maota, ua tatau ona o tatou silasila totoa i le isi laasaga mo le lumanai. Ae o le itu sili ona ou faatauina lau afioga i le Fofoga Fetalai, na savavali loa le Palemene, na vave lava ona fai faaiuga.

O faleaoga uma ia na tapuni, na fanau mai ia le 5 faleaoga fou na omai Saina fai. E tai \$5 miliona i le faleaoga. Na fai ai le faleaoga o Manono, fai ai le faleaoga o Palalaua Siumu, fai ai le faleaoga o Falevao, fai le faleaoga o Palauli Sisifo. O faleaoga na, na fanau mai i le mea lea, ina ua vaai mai tatou donor partners e taua le mataupu lea. O lea ua oo i le Palemene o savavali, champion of promoting healthy living. O le taua foi lena sa avatu ai ma le mau lea, ia fai faalelei ia faleletaua. Ia tulou lava lou taua o afioga ia, o Tuanai ma Asau ma isi nofoaga, tulou lava. E matou te o atu o la e taatitia atofuafua i totonu o faleletaua a tamaiti, ma taatitia ato maa tulou lava. O le itu lena lau afioga i le Fofoga Fetalai, na liliu uma ai mafauauga, agai mai loa ma Iapani, Saina ma i latou nei, o lena ua outou vaai i le lolaga lea ua alu ai nei le faafouina o tatou faleaoga.

A o le mea tele na tupu lau afioga i le Fofoga Fetalai, na i ai le feteenaiga i le va o au sa ou Fofoga Fetalai ma le va o le Malo i le taimi lena, ona ua manatu le Palemia ma le Kapeneta i lena taimi, ua sopoloa le galuega a le Palemene, ma taofi ai loa ma le mataupu lea, na ala ai ona mafua au ona taofia le Komiti Faa-Palemene lea. A o lau mau lau afioga i le Fofoga

Fetalai, o le a se vaauga pe a na faaauau mai lava i le sefulu tausaga talu ai, e tau mai lava i le taimi lenei? Ou te talitonu lau afioga, e tele le faasaoina o le tulaga maaleale lea ua tatou i ai.

E le i lalo ifo o le 20 tagata o lo o ave i Niu Sila i vaiaso uma, o lea e transfer lava le toatele o gasegase e ave i vaiaso uma, ona o le tulaga lava o taumafa. E avatu ai lau tuualalo i lau afioga i le Fofoga fetalai ma lenei Palemene, e le o se mataupu e tatau ona tatou faatamala le mataupu lenei. Sa ofoina foi e le sa avea ma Minisita o Faatoaga i na taimi, e avatu uma lava ia fua o fualaau aina ma fua o fualaau taumafa mata e toto uma i totonu o lotoa o faleaoga. Ae o le faalavelave e le i mafai ona faaauau lau afioga, ona ua i ai le va o le finagalo o le Faigamalo ma le Palemene, to'a ai loa ma le mataupu lenei. A o lau tatalo lau Afioga i le Fofoga Fetalai, a i ai se suiga fou e tatau ona tatou faia i le taimi lenei, ia amata atu i totonu o le tatou Maota lenei. E faamata ana faapea e faaauau mai le polokalame lena i le taimi lenei, ailoga o lou tino lenei, o le upu sao, o le upu sao, e leaga o au lea e victimize i le mea, tulou lau afioga i le Fofoga Fetalai.

A o lau faamalosi ma lau tatalo i le Minisita o le Soifua Maloloina, ma le Minisita o Aoga, toe tulai mai, tatou onosai e avatu le lagolago a lenei Matagaluega, e faatuina ai gardens o a uma mea e avatu i totonu e foia ai le faafitauli i le tulaga i le mu'amu'a o le soifuaga o alo ma fanau, amata mai i le aoga amata seia tau i le kolisi. E le i oo le latou taumafa i mea ia tatou te aafia ai, tuu ia le upu mai, leaga I rebuke i le name of Jesus le mamai, aafia ma e tatau ona tatou tutu faatasi i le agaga e lagolago le mea lenei, e tatau ona soifua maloloina lo tatou atunuu. O le faamanatu lea lau afioga i le Fofoga Fetalai, ona o lea ua e taua le SPAGHL, Samoa Parliamentary Advocacy Group for Healthy Living, ma ou te toe ofoina atu lou tagata faatauavaa ma Olo e fai ma sui o lenei komiti pe a e toe finagalo ai, e faaauau lenei Komiti taua, aua le lumanai manuia aemaise le soifua maloloina o le tatou atunuu. Ma lou agaga faaaloalo faafetai mo lou avanoa.

FOFOGA FETALAI: Ua malo faafetai saunoa i lau afioga i le Minisita o Faatoaga ma Faiga Faiva, aemaise foi o le toe faamanatu mai o le tatou faamoemoe e pei ona faatino i le Nofoaiga Lona XV, ia e sao lava. O lea foi ua manino i ai le tatou maota aemaise o le atunuu i lena taimi, i le naunautauga o le tatou Komiti ma le Palemene, ina ia fesoasoani ma foia faafitauli ua tatou i ai nei. Ae malo faafetai faamanatu. Ua lelei o lea ua maua atu e le Nofoa, o le a taumafai i ai se auala ina ia toe faatino lenei Komiti taua ma le Komiti aoga, ia faapena ona fesoasoani ai mo le agai i luma, aemaise o le Soifua Maloloina o nai o tatou tagata. E faafetai mo le faamanatu, aemaise foi o se avanoa foi e faamalamalama atili ai le taua, aua lava le soifua maloloina o le atunuu, e pei ona i ai le folasaga a le Minisita o le Soifua Maloloina, ina ia taumafai e faaitiitia ia i latou ua aafia i lenei

gasegse i lenei vaitaimi. Ia malo faafetai i lau afioga i le Minisita mo le fesoasoani mai.

Tulai mai lau afioga i le sui usufono mo Siumu, o i ai se isi mea o toe....

Afioga Hon Tuuu Anasii Leota: Ioe lau afioga, o lea sa e taua le matou aoga i Palalaua, e moni le Minisita, sa tapunia, e tasi lava le aso sa tapunia ai, toe faaleleia loa toe tatala i le isi aso. Ae faamanatu i le Minisita o au le isi sui faavae a le SPGHL, ma lou faaaloalo.

FOFOGA FETALAI: Ia malo, faafetai mo le faamanatu mai, e taua foi le toe tulai mai, e malamalama ai foi ma faamanatu mai i le tatou Maota. Faamalo galulue i na taimi, o lea ua tatou agai i luma, o le a silasila i ai le tatou Palemene.

Tulai mai le sui usufono mamalu o Anoamaa 1.

Afioga ALAIASA MOEFAAUOUO MALAGAITUTOGIAI SEPULONA MOANANU: Faafetai mo le avanoa i lau afioga i le Fofoga Fetalai. Ua se ligoligo foi le Maota saunoaga matagofie i lenei taeao, e matimati ai le ola soifua maloloina o Samoa ma lo tatou atunuu, aemaise foi le saunoaga a le Minisita o le Soifua Maloloina, Minisita o Aoga, o lea foi ua toe fonofaapipii mai le Minisita o Faatoaga ma Faiga Faiva. Ou te faafetai i le lagalaga i mea lelei, e logo i tino matagi lelei i timaiga ma saunoaga faapea. O la foi e faafofoga mai lo tatou atunuu. E leai lava se isi o tatou e naunau ia soifua maloloina lo tatou atunuu, e amata mai lava i le au ao sinasina seia oo i alo ma fanau. Ae o le faigata o le mea, o lea ua tatou feagai nei ma faafitauli. Ua to foi i tua Apolima i ia fatia, e tusa ai foi ma le mea ua aafia ai tatou. Ae le na o tatou foi, e aafia uma lava le lalolagi i nei faamai. Ona o lea e tau sue lava po o le a tonu le mafuaaga, po o mea taumafa, po o a nisi mea, po o mea e taumafa i mea inu, o mea uma lava nei e tupu ai le faaletonu o fatugao, ona oo loa lea i tatou masini.

Ae fia faaoga lenei avanoa i le lipoti lenei, e momoli ai le faafetai i le pulega o le tatou Ofisa lea, aemaise o le Komiti faafoe, faapea le Minisita. O nai tagata nei e mafai ona ou vaai i ai, o e agalelei ma o e foai tupe mo le Faalapotopotoga. E pei e i ai ekalesia fono a ekalesia, e maea faaii e fai se latou foai. Ia e momoli atu le faafetai i tulaga uma ia, i le agalelei. E tatau ona tatou lagolago uma i lenei faamoemoe. O le tulaga i le lipoti a le Komiti, ua tau fai sina ou faanoanoa ona o le fesetai lea pei ona maua i le latou lipoti. E fai mai e onosefulu fa ia masini lea e i ai, ae o lea e faasao mai e le Minisita e na o le tolusefulu ma ona tupu. E feololo pe ana sese tasi pe lua, ae tusa e tolusefulu lea e sese ai. Aua e fai si tele o le eseese, ae o lea faatoa tau mai, o lea e talia le isi masini fou e taunuu mai. E tatau ona toe silasila i ai le tatou Komiti, ia aumai mea moni i totonu o le tatou Palemene. Ae aua lea

sa taua, sa alu le physical inspection, sa alu le asiasiga. Ae o lea la e fai si feololo o le eseesea lea ua tulai mai.

O nai mea ua ou matauina i le lipoti, o lea e tulai mai e sefuluvalu le aufaigaluega, a o le tupe lea e faaalu i le aufaigaluega e \$2.5 miliona, ua ou vaavaai i ai, ua fai si tele o le tau lea, le personnel cost, ua toetiiti lava uma ai le tupe lea e avatu le grant a le Malo, ona alu i le tatou aufaigaluega, se i silasila ane. Aua o lea e tau mai, e 18 le aufaigaluega ae fai sifi, ou te le iloa po o le mea ua fai ovataimi ma mea faapena. Ae taua foi le toe silasila i ai o le tatou pulega.

O le isi mea lea e tau mai i le lipoti, e 219 ia gasegase, 48 mea fou, tagata fou se i tulou ua aafia i le tausaga lea, e 60 i latou na malaga mai atunuu mamao. Ae fia maua pe fia ni gasegase na maliliu i le tausaga lea. E leaga o le tele o faaupuga ia ta te faalogo i ai, e te alu loa i uta, ua faitau foi aso o lou soifua. O lau matamata i tatou masini ia e faaaoga, e pei ua tatou oo i le tulaga foi lea ua obsolete, a matamata i le mea ia o le faaitiitia o le tau o aseta, ua laititi lava e pei e tau mai ai, o le tele o nei masini o masini tuai, ae tatau ona fai se tatou polokalame foi lea, e sui ai tatou aseta nei, ina ia faavavae i ai se tupe i totonu o le paleti, ina... pe 10 i le tausaga po o le a, e tatau ona i ai se tatou peleni faapena, mo le agai i luma o le tatou Faalaptopotoga.

Ou te faafetai i le tulaga lea, leaga o lea ua avatu le talosaga e fai se isi tatou... po o le faataitaiga o Vaitele. Ae o lea sa tu le loma i le saunoaga a le Minisita i nai talosaga, e pei e amata mai i tatou falemai faaitumalo ia le taou faamoemoe lea i nai isi masini. Ina ia faapena ona tua i ai lo tatou falemai i tua ma faaitiitia ai le feoi o e gasegase i le tulaga lea.

Lau afioga e lagolago foi i le...ua ou faalogo foi i le mea lea o le SPAGHL, sa matou i ai foi i tua atu, ae pei na faaauau e le afioga i le Fofoga Fetalai, ae o se mea taua tele le mea lea pe a faapea e tofa i ai lau afioga.

Ia manuia le Pulega, faafetai i le tautua ma le auaunaga, manuia le afioga i le Minisita, manuia lau afioga i le Fofoga Fetalai, soifua ma ia manuia.

FOFOGA FETALAI: Malo faafetai faasoa i lau afioga i le sui usufono mo Anoamaa 1, malo lava mo le faasoa. Maua foi lou finagalo faaalia, aemaise foi o nisi o mataupu ia manino ai lo tatou Maota, faapea foi le faafogafoga mai a lo tatou atunuu. Malo faafetai.

Tulai mai lau afioga i le sui usufono mo Vaimauga 1, malo malaga manuia. Sa e toesea i le faaiuga o le vaiaso mo Niu Sila, a o lea ua ou toe vaai atu ua e saofai mai. Ia malo lava le malaga manuia.

Afioga SULAMANAIA FETAIAI TAUILILI TUIVASA (Vaimauga 1): Masalo e momoli le agaga faafetai o lenei itumalo, e faatalofa atu i le maualuga o lenei Maota i le afio o lau afioga i le Fofoga Fetalai, malo i le

faatautaiga o le tatou sa, e mai lava i le vaiaso ua tuanai e oo mai i lenei vaiaso, ia viia le Atua. E le faigofie le taitaiina o le Maota o le atunuu, ae faafetai mo le faatoatoa ma le lava onosai i lau afioga. E faatalofa atu foi lenei itumalo i lena Itu, afio lau afioga i le Sui Palemia, aemaise le afio atu o Minisita o le Kapeneta, faapea foi Minisita Lagolago. E faatalofa atu foi i le lato i le tai o le Minisita o Tupe, faapea lau afioga i le Minisita o Faatoaga. Ia liliu mai i lenei Itu, e faatalofa atu foi i afioga i le Taitai o le Itu Agai, aemaise o sui usufono o le Palemene, aemaise foi o nai ou uso o lo o i tua nei, ia faamalo. E faamalo atu foi i le susuga i le faafeagaiga ma le faletua, ma le paia o le aufaigaluega a le atunuu Ofisa Sili o Pulega o Matagaluega a le Malo, o Faalapotopotoga, ia faamalo.

E matau lava ma le totoa ia felafolafoaiga a lenei Palemene i lipoti faaletausaga i Paeaiga foi ua tuanai, e momoli lava le agaga faafetai e pei ona saunoa foi nisi o lenei Maota i lau afioga i le Fofoga Fetalai i le toe aumaiga o nei Lipoti, ina ia faalogologo foi le atunuu aemaise foi o i latou o lo o galulue. E maua foi i le Lipoti a le Faletupe o Atina'e, ia e momoli foi le agaga faafetai ananei i le taeao. E oo mai le taeao lenei, o lea foi ua i luma o le Maota le 2022 ua maea foi ona tuuina mai totonu. E momoli ai le agaga faafetai.

Ae o le tulai o lenei itumalo, e momoli le agaga faafetai i lau Afioga i le Minisita o le Soifua Maloloina. Ia e tau loa le falemai, e leai lava se isi e le fia talanoa ai ona e fefefe uma i le oti, aemaise lava le tulaga lea i le faamamatoto. Ia o le agaga faafetai i lau Afioga i le Minisita, o lea ua e faafetai i lou tuafafine sa tulai mai i le tauaveina o le tofi, a o lea foi ua toe tulai mai le isi foi sui usufono o Puleono. Ia viia le Atua i le valaauina.

Ae o le tulai o le sui usufono o le Vaimauga e momoli le agaga faafetai i le Faatonusili sa i ai le afioga ia Samau o le Vaimauga i le tulaga sa i ai le tulaga sa faatautaia ai lenei Matagaluega i taimi ia e i ai le Lipoti lea. E momoli le agaga faafetai. A matau foi i le Lipoti ua tuuina mai, ia o le tele ia o polokalame e pei e i ai le polokalame lena mo iuga, po o le programme for results. O le polokalame lena sa taumafai ai ina ia fai se fuafuaga po o ni faiga faavae ia aua ne i aafia ai mea o totoga po o le NCDs. Ia pei la o le agaga lena sa fiafia ai lava lou sui usufono i le Paeaiga ua tuanai, ona sa mafai ona agai atu Matagaluega i tua i itumalo e toe faamamalu mea foi na e o fale komiti e fai ai tui, tulou, siaki ai foi pepe, tulou, siaki ai foi tatou po o toto maualuga ma suka, ma mea faapena. O le agaga faafetai lena. O lea foi ua toe aumai i le polokalame lea, e pei o i ina lea na fanau mai ai le tulaga lena i le toe agai o le Matagaluega i tua i falemai i nuu i tua.

Ae o le tulaga i le fatugao po o le famamatoto, ia, e momoli le agaga faafetai Mulipola Hazelman i le tulai mai i le faatautaiga o lenei tulaga. A o le tuualalo a le sui usufono, sa ou i ai i le Paeaiga ua tuanai i le atunuu lea o Sigapoa, tulou le Maota lenei, i le tulaga mo mea o masini faamamatoto i le

atunuu lea, o le televave ia o le tamaoaiga. A o le tulaga foi i masini faamamatoto, tulou le Maota lenei, pei lava o mea o pamu penisini, tulou, e te alu atu lava oe, i le tele o e maua i le gasegase, e te alu atu lava oe pei o le pamu lea i Fugalei, tu lau taavale faamama lou toto. E pei e faapena le vaai i le tamaoaiga. Se aua e te soiso alii Mauu. Lea la e lui ai lau Afioga i le Minisita, ina ia mafai ona faatele faapena ni tatou masini. O lea foi na saunoa le uso ia Lufilufi, o Tuisamau ma Lufilufi e uso ina ia faamatuu atu i itumalo. Faafetai o lea e faalogologo si ou itumalo lau Afioga i le Minisita ua talia le ta falemai, o la e ua i ai le fanua ua ioe mai le Minisita o le MNRE la ua fai ai le matou fale o le itumalo, ia toe fai ai ma le falemai ma le Ofisa o Leoleo ma le Fuimu, o la e ua avanao mo se ta falemai. E tatalo atu ai i lau Afioga i le Minisita ina ia faapena ona faatelevave.

A o le tuualalo, tulou le Maota lenei, o le tele ia o nai tagata o si ou aiga ma si ou itumalo, e pei e o atu loa i le falemai ae fai mai le falemai, ia ave loa i le faamamatoto. E pei o i ina lau Afioga i le Fofoga Fetalai aemaise le Minisita, o nisi e tau mai loa e ave i le faamamatoto fai mai loa le toeaina ma le olomatua, e leai, ou te le fia oo lava au i lena mea, ua ou manao lava ou te alu loa ma te feiloai ma lou Alii ma lou Faaola. E pei la o le lagona i lenei itumalo, ina ia i ai se tulaga faapena i le falemai, aua ne i faia i le manao o le mai, a ia mafai lava... aua o le tele na o gasegase, e fai mai loa ua leai se togafitiga, o oe lava o le sau loa e faamamatoto, fefe loa le mai fai mai loa, leai la, ave au i tua tatou te nofonofo ma tatalo ma... ia alu atu loa lava ma faatofa atu ai lava.

Ae o le uiga o le tatalo a le Vaimauga lau Afioga i le Minisita, se i mafai ona fai ni faiga faavae, ina ia faataunuu pea le ave pea e togafiti e faamama le toto. Pe le manao le ma'i pe a, ia faataunuu pea ina ia maua le ola.

Lau Afioga i le Fofoga Fetalai, pau na o manatu o lenei itumalo. Ae avea foi lenei itula e faaleo atu ai se faafetai o lenei itumalo i si ou itumalo e tusa ai foi ma le faamati a le Afioga i le Tiakono Toeaina i le vaiaso ua tuanai. Faafetai ua tamaoaiga lava le paia o le aufaigaluega a le Atua. Ia o le upu lava a le atunuu, e le o se mea faaleaoga lo outou tautiga i le Atua.

E faatalofa atu foi le Vaimauga i usugafono mai Susuga i Toeaiina ma Feagaiga mai atunuu mamao aemaise lava tama fanau a lenei afioaga le Afioga ia Maafala Tuliaupupu. Ia manuia le tou usugafono.

Ia na pau lena o le matou leo lau Afioga i le Fofoga Fetalai, ia manuia tele lau Afioga i le Minisita aemaise lena tala na atoa faapena lenei Itu faapena foi nai ou uso, faapea foi le tapuaiga a le Susuga i le Feagaiga ma le faletua. Ia ona o Iesu.

FOFOGA FETALAI: Malo faafetai saunoa i lau Afioga i le sui usufono mamalu mo Vaimauga 1. Ia, malo lava mo le saunoaga, aemaise foi o

fautuaga pei ona tuuina mai i le Afioga i le Minisita ma le tatou Pulega aua lava le agai i luma. Ia, ou te talitonu o lea ua maea...

Oi, ia, tulai mai lau Afioga i le sui usufono mamalu mo Aleipata Itupa i Luga....

Oi, malie se i tulai mai ia le Afioga...

Afioga Fuaava Suluimalo Amataga (Aleipata Itupa i Luga): Ia, o le a muamua atu ia lo'u tuafafine.

Afioga FAAGASEALII SAPOA FEAGIAI (Sui Usufono Tamaitai - Aleipata Itupa i Lalo): Ia, malo faafetai i lau fioga i le Fofoga Fetalai mo le avanoa. E faatalofa atu foi i lau Afioga aemaise le paia ma le mamalu o le Palemene i le au sui usufono uma faapea Ofisa Sili o Pulega o Matagaluega taitasi.

Ia, a logomalie lava se mataupu, ia e fiafia foi, e tele foi manatu e faaali i ai pei o lenei itula o le aso e tusa ai foi ma le mataupu ua talanoaina ona e momoli atu ai le faafetai i le Afioga i le Minisita o le Soifua Maloloina e tusa ai foi ma le lagolagosua ma le faamalosiau foi i le taumafaiga lava o lenei faamai. Aua po o le a lava lou malosi, po o le a lou poto, o le a lou atamai, ae a e le soifua maloloina, ia e le aoga uma au galuega, e le mafai ona e faatinoina au galuega. O lea e momoli atu ai le faafetai e tusa ai foi ma lenei itula.

E momoli foi le faafetai i le Afioga i le Minisita o Faatoaga, ona o le mea lava lea o lea e taumafai e uunaia tatou ona o le mea ia o tatou faatoaga ia i fualaaauina, faisua ma fualaaau taumafa mata. E pei lava o le aoga tonu lea o le puipuiga o le gasegase lea po o le a lava nisi togafitiga, o le a lou faamalositino o le a le... ae a le paleni lau tausami, o le a le aoga uma ia taumafaiga uma o lo o e taumafai i ai.

Ia o le faamatalaina la lea o le paleni o le taumafa, aua pei na ona tatou tautala faapea o le paleni o le taumafa, paleni le meatausami, ia ae le o iloa pe faapefea ona paleni. Ia a faapea e fai sau supo, taumafa sau moa i le aso, e tatau ona fai lau supo, e tatau lava ona ave i ai sina maukeni, sina kapisi, se kapisi vai, o sina au fai se lua ma sau fasi i'a i le aso po o le aoauli lena. A fai lau malutaeao i le taeao, o sau fasi esi, o sau toast, o sau fuamo po o sau polesi, ia o lau morning tea lena. Ia oo i le vaiaiga o le aoauli ia taumafa sau apu, po o sau moli ia po o sau faipula... ia o le...

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, pe maua se avanoa...

FOFOGA FETALAI: Ia saunoa lau Afioga.

Afioga Sulamanaia Fetaiai Tauilili Tuivasa: Ou te le fia faalavelave lava i le saunoaga a le tuafafine ae pau lava le mea ou te fia fesoasoani atu ai e tatau ona faamalamalama i le tuafafine, e le o toe avea o ia o se teine tausimai, o lea ua avea ma tamaitai sui usufono. E pei o le agaga lena e fia tulai atu ai ma le faaaloalo.

FOFOGA FETALAI: Ia e moni lava ua le o toe... ae o lo o taumafai e faafoa mai foi lona foi silafia faa-tamaitai tausisoifua, ia lea foi e aoga i a outou Afioga.

Tulai mai lau Afioga i le sui usufono tamaitai mai Aleipata Itupa i Lalo.

Afioga FAAGASEALII SAPOA FEAGIAI: Malo faafetai. A e le fia faafofoga lava... Lau Afioga i le Fofoga Fetalai, leai na o sina taumafaiga lava e faamalamalama ona e pei lava na o le saunoa o sui usufono i meaai paleni, ae le o malamalama foi. Ae tatau foi ona faaitiitia lau tausami i le masima ma le ga'o.

Ia mo i latou foi ia le gugu, aua pei lava o le isi gasegase lea o lo o faateteleina ai le mai lea o le fatugao, ona o le oso loa o le tiga o lou vae po o... se i tulou lava, o sou aao po o... e tapa loa i lau fualaaui ae te le i tausami, o lo o gaogaoina lou laualo. E tatau lava ona e tausami muamua ona inu ai lea o lau fualaaui gugu. Aua o le isi mafuaaga lea o lo o tele ai le gasegase o le fatugao, o le au ma'i gugu, o le au ma'i suka, o le toto mauuluga, ona o le mafua lava o le lē paleni o lau tausami ona o le aafiaga o fatugao, e le gata ina aafia ai lou tino ae matuai aafia ai lou mafaufau. O le mea foi lea i tatou aiga o lo o aafia i gasegase o fatugao, i tatou tuua aemaise o tatou fanau, ia tatou taumafai e faafiafia, aua e aafia foi lona mafaufau i le gasegase lea o le fatugao. Ia tatou tutu malosi ma tatou lagolago i tatou aiga ina ia faapea ona latou taliaina le gasegase ua latou mauaina.

Ia, a o se tuualalo ma se fautuaga foi i le Afioga i i le Minisita o le Soifua Maloloina, ona o se talosaga...

Afioga Alaiasa Moefaauouo Malagaitutogiai Sepulona Moanan (Anoamaa 1): Lau Afioga i le Fofoga Fetalai...

FOFOGA FETALAI: Malie le sui usufono mmalu se i tulai mai le sui usufono mo Anoamaa 1.

Afioga Alaiasa Moefaauouo Malagaitutogiai Sepulona Moananu: Se ua manaia lava le saunoaga a le Afioga i le sui usufono mamalu, ae o si mea ou te fia malamalama ai lau Afioga, leaga o lea tatou te talanoa i tagata mama ii fatugao, pe faapea la o la e faafofoga mai i le fale, o le a se tali a le Afioga i le sui usufono pe a faapea o lea o le a ta toe taumafa ai i taumafa ia na lau

nei, a o au lea ua ave i le fale faamamatoto, pe toe malosi ai lota ma'i i le toe sui ai o lata taumafa i taumafa ia na...

Ia ma le agaga faaaloalo.

FOFOGA FETALAI: Ia, masalo o le faamamafa a le tamaitai sui usufono foi, o le puipua mo le agai i le lumanai.

Ia faaauau le saunoaga a lau Afioga i le tamaitai sui usufono mai Aleipata Itupa i Lalo.

Afioga FAAGASEALII SAPOA FEAGIAI: Ia faafetai lava mo le faafesili. Ia pei o le auga tonu lena o le faamalamalamaga o le puipuiga, aua e sili le puipua i lo le togafitia. Afai foi ua e aafia i le gasegase lea, ia, o ni fautuaga na e faaititia ai. A e manao e faaauau ma umi lou soifua ona e tausisi lea i au taumafa a o la e ua fai lau faamama, o la e ua faamama lou toto.

Ia ne i tele naua se faamatalaga, a o se tuualalo lava i lau Afioga i le Minisita e faaleo atu ai se... e tusa ai foi ma ni aoaoga i le iunivesite a tausisoifua o lo o latou faatinoina le galuega, ona e pei e matau i le mea o lo o i ai, ona na o le 6 lava ni masina o lo o o atu ai fai trainings foi ia, na o le masini lava ma le amataina o le faamamaina o le toto. A o isi vaega uma e pei o le itutino, e tatau ona malamalama uma i itutino uma o le tagata soifua, po o a ni aafiaga e tutupu mai, a o la e malamalama lelei ai. O le mea lena e tuu atu ai i lau Afioga i le Minisita e te silasila ifo i ai mo le faaauuala atu o ni aoaoga i totonu o le iunivesite mo tausisoifua ona o le isi galuega lea, o se aoaoga faapitoa foi ma ni tomai faapitoa, ia, o le faamamatoto.

Ia, faafetai i lau Afioga i le Fofoga Fetalai mo le avanoa, faamanuia tele le Atua i le tatou mafutaga nei le tatou au usufono. Faafetai.

FOFOGA FETALAI: Malo. Faafetai foi mo fautuaga a le Afioga i le sui usufono mamalu, ua faasoa mai foi lona tomai a o galue foi le soifua maloloina, aua lava le puipua o le tatou Maota aemaise foi le faafogafoga mai a le atunuu. Malo saunoa.

Se i tulai mai lau Afioga i le sui usufono mamalu mo Aleipata Itupa i Luga.

Afioga FUAAVA SULUIMALO AMATAGA: Ua faafetai i lau Afioga i le Fofoga Fetalai mo le avanoa. Ia o le a taumafai atu ia le fale i luga e soosoo atu si a matou pito le fale i lalo ma le fale i luga mai Aleipata. Ae talitonu o le a ta folau ia i lou sa pei ona e saunoa i le taeao, e faapoipoi foi mamalu i le faafogaga a le Maota i le tatou faigamalo aemaise Afioga i sui usufono aemaise foi o Ofisa Sili o Pulega o Matagaluega ma Faalapotopotoga, ma le mamalu o Samoa ua tatou auai e molimauiua lenei fonotaga.

O le faafofogaaga foi a si o tatou atunuu, o lea ua e saunoa i ai ae taumafai atu se faamatalaga e tusa ma le Lipoti a le Komiti. O le agaga faafetai ona o lea ua taatia mai le Lipoti, aemaise foi le faafetai i le Faalapotopotoga, o lea e auai mai Ofisa Sili o Pulega ma le Pulega e tusa ai foi ma le galuega sa feagai ma i latou, o lea ua aumai le Lipoti a le Komiti.

E faafetai atu foi i le Afioga i le Minisita, ua manino lava le saunoaga faalauaitele ma faamanino nisi o tulaga ia e pei foi ona aumai i totonu o le Lipoti a le Komiti.

O lea ua saunoa i ai le afioga i le Minisita i tulaga o togafitiga. Ia ae o lau iloa o se taimi taumafai atu se motugaafa a lenei itumalo e tau faamamafa se matou faamatalaga i le puipuiga. Aua o lea ua agai le Malo fai ia le latou tapenaga ia o togafitiga ma o lea ua pasia ai le toe faaopoopo o nisi o masini se 30, ona ova ai lea e pei ua 60 masini ia o le a faaoga mo le togafitiga lea.

Ia ae o lea ua i luma nei faamaumaga ia le talosaga foi o le falemai o lenei itumalo, ia ona o le gasegase lava lea. Ia ae faafetai o lea ua tafa le finagalo o le Malo ia ma ua faataunuu mai nei ia Me po o Iuni, ia masini fou ia e 30, ia atonu o le a maua ai se tasi ma se lua, standby le isi ae run le isi ia mo lenei itumalo e atu tuumama ai le feoi ma omai, e pei ona tou silasila foi i le leaga o auala, ia aemaise o le taumamao o le leaga o le tau.

E pei ona iai nisi na molimauina le faalavelave na tulai mai foi i le weekend. Ia e avatu ai foi ia tulaga e aualofa atu ai i e foi sa faapea ona faamanualia. E pau o le agaga faafetai i le Atua, maua tala e leai se isi na maumau se soifua. A o le tulaga lava ia e fia faalautele ai se faamatalaga, o le puipuiga. O lea o le a omai mai e tuli mai le taulaga e fia taoto ma faamama toto. Ia ae ono afaina o le auala. Ia e pei la o se tasi ia o vaega e faalautele ai se faamatalaga a lenei itumalo, ia o puipuiga lava ia aemaise o faigata foi o feoaiga, taugata o le sauu ma le penisini e tausavali mai ai mai tua le toatele foi o nisi o le matou itumalo, ia aemaise foi o le atu Fagaloa ma tulaga uma i nuu i tua faapea.

Ae o lea ua saunoa lou tuafafine mai le fale i lalo, aumai manino le tulaga i le puipuiga aua o le talitonuga foi o lenei itumalo, ia o le upu masani lava e sili lava le puipui i le toe tauapaapa e tau togafiti. O lea la e avatu ai se fautuaga i le puipuiga lea o lea ua saunoa i fualaau aina, paleni le taumafa, tulaga uma faapea. O lea foi e aumai le fautuaga a le Komiti, faafetai i le fautuaga, ina ia galulue le Matagaluega o le Soifua Maloloina, lagolagosua le Matagaluega o Aoga, aua a lelei ona aputiputi mai alo ma fanau ia paleni taumafataga, ia saunoa manino le Minisita o Aoga, numera 1 i le fonotaga sa fai, Nutrition, le paleni lea o le soifua maloloina o le tamaitiiti. Ia atonu foi o i ina e ala ai foi le mafaufau, ma lelei ai foi ia le aoaoina. Ia ona o le tulaga lea o la e malosi le tino, soifua maloloina ma tulaga uma faapea.

Ae o le tulaga e pei ona avatu ai se faamatalaga, ia i ai le meaai foi lea e taua e tatou o le Protein, iai foi le meaai mo le tulaga taumafa mata ae o lea

ua saunoa nisi o sui usufono, ia e sao lelei lava e auai foi le manatu o lenei itumalo. I tatou taumafa ia e agai mai i fafo, o lea ua... o le tele foi o pusamoa ia ua iai nei, e aumai ua piilua alagamoā se i tulou. A o au ua ou tau faapea po o pusamoa po o ni pusa pipi aua ua... e pei ona saunoa nisi, ua toetiiti lava pei o le size 2 le alagamoā e tasi.

Ae e iai foi nisi o tulaga sa ou matauina foi i fafo i nisi foi fonotaga sa iai, i le tulaga lea o le faatinoina o galuega nei, e kamupani o lo o faatauina ia le aano o manufasi. O lo o iai foi ia le vailaau foi lea e uunai ai le tino o le moa ina ia vave ona tupu, vave ona mamafa. O totonu lava o nai masina ua ono faatau, ae o le popolega, ina ne i sau le vailaau lea e aumai ma le moa, taumafa le tatou atunuu, ma tauave ai lava ia le vailaau lea faatupu tino. E pei o se tulaga lea e tau avatu ai se... ia na o se tuualalo, o lea e iai ia le tatou faalapotopotoga, SROS, e suesueina tulaga ia.

Sa ou taua foi i le isi Fonotaga talu ai, sa ave ai foi tuualalo i lou uso a Minisita o Faatoaga, i le faaogaina lea o vailaau i faatoaga. O la e inu ai le talo, o la e inu ai po o a lava ia tatou meatoto i le vailaau lea. E oo foi i le palapala, o la foi e inu. E iai lava le taimi e alualu ai, e le toe gafatia e le siosiomaga, le inumaga lea o vailaau oona.

E iai foi le la taimi e oo atu ai, ua le toe ola ma ua faalautoafaina aemaise e iai lava lou talitonuga, aua e pei foi o le faamamaina o le suavai, e iai lava le residual foi lea e alu lava ma le vai i le faiga o le chlorination. Ae ou te iloa foi la o vailaau nei ou te iloa foi la o lo o iai le inumaga a le laau toto, e ono oo ai foi tatou. Aua a taumafa o lona uiga o la e sau foi ma le vailaau lea oona pe o le a lava le function o le vailaau lea o lo o fai i manu aemaise foi o laau toto.

Atonu o se tasi lena o aafiaga o lea e aafia ai o tatou tino ona o lea e iai le residual lea e aumai e taumafa nei ma tatou aumamafa ai, ia ma ono iai se tulaga faapena, ia ae o se mea e faatupu manatu e tuualalo pea, e lelei le sailiili pea alagamoā ia mai fafo, aua e moni lava e iai tulaga o FDA ia o o i le Malo tele o Amerika e iai le FDA e assess ina mea nei. Ia ae o lea foi ua iai le tomā ia tatou, e fai ai foi ia standards, o tatou standards foi lea e taumafai e verify pe sao po o le mea e ese foi le asiasiga a le FDA i o e na o mea e sell i totonu o Amerika ia make sure ia tick uma ia box. Ae a sau isi mea i isi atunuu, faamisi isi mea. A sau lava le vaemoa e lapoa, ia ua faigofie foi ona taulia. Ae pei o nai tulaga ia o se taumafaiga a lenei itumalo, i le autilo lea i le puipuiga. O lea ua iai taumafa e tatou te faaogaina, ae se i toe siaki lava po o atoatoa le tulaga ia aua le malupuipua o le mamalu o si o tatou atunuu.

E faafetai foi i le faalapotopotoga lea ua aumai manino le tulaga i le tele o le latou seleni sa faaluina, ia ma ua faaititia ai le tupe maua foi ia tupe, a ua tele ia latou expenses ona o tausaga tonu ia o le vevesi o tatou i le misela

ma le Koviti. Ia aemaise foi sa toe lifi aifo i luga, ia le safety o faalapopotoga ia.

Susuga Hon Laauli Leuatea Polataivao Fosi: Lau afioga i le Fofoga Fetalai...

FOFOGA FETALAI: Malie ia le sui usufono mamalu se i tuu atu le avanoa i le afioga i le Minisita o Faatoaga ma Faigafaiva...

Susuga Hon Laauli Leuatea Polataivao Fosi: Faafetai mo le avanoa, ua ou manatu e fai sina leo ona o lea ua toalua i i sui usufono ua taua le mataupu lea o vaemoa. O le matou Malaga lea na matou o ai nei i Fiti, na matou o atu, o le taumafataga lea na fai e Fiti i mea tau moa, 95% e fai lava i totonu o Fiti. E leai, leai ma se export o sau mai fafo. 90% o le supply o mea tau aano o manifasi moa, o Fiti, e gaosi i totonu o Fiti.

Ma ou te faamaonia le mea lea e saunoa iai le sui usufono mamalu, i le tulaga lea ua o tatou vaai iai, i le taimi lenei i le atunuu, e le i lalo ifo o le 50 container 40 futu i le masina lea e tatou te taumamafa ai i le vaemoa lea e sau mai i fafo. E 50 container moa 40 futu lea e tatou te taumamafa ai i masina uma. A faaliliu, e le i lalo ifo o le \$11 miliona i le \$12 miliona moa atoa i le tausaga lea e tatou te taumamafa ai.

Ma e ou te faataua tele le finagalo o le sui usufono lea ua aumai, ua tatou faalagolago tele, i lenei fia 10 tausaga ua ova ma le 30 tausaga, o tatou aai i aano o moa fasi mai fafo. Ma e ou te manatu e tataua lava ona address le issue lea. O lea faatoa ma foi mai nei ma le afioga i le Minisita o Siosiomaga. Na ou savali i falemoa nei i Fiti ma ou maofa ai i le supply lava e Fiti ia o latou moa fafaga i Fiti lava ia, e taumamafa ai le atunuu. Ae se i silasila la i le mea lea tatou te iai?

O se matua tulaga lamatia e tatou te le iloa o lea ua saunoa nei sui usufono, sao o lea ua tatou vaai, tasi se vaemoa tatou tilotilo iai, aua o mea lava ia e iai le malupuipua o tatou, ia lea e tau uunai atu ia tatou polokalame, fafaga a tatou moa. Toe uunai le polokalame lea e faasoia atu nei e ova ma le 30 faifaatoaga a Upolu ma Savaii ua iai tatou free range, e toe faatimata ai le tulaga lenei o le fofoa o a tatou moa Samoa o lo o fafaga i totonu o le tatou atunuu.

Ae ua ou manatu e avatu ia le faapinega lea o le saunoaga a le sui usufono mamalu e taua, ia tuu ai le mea nei o le tatou ola faalagolago i meaai mai fafo lea e tatou te mafatia ai. E le gata ina o tatou le iloaina po a mea nei e i totonu, ae o le alu o le tatou foreign exchange i le tau faatauina mai o oloa nei. Ia o le taua lena o le tatou Poloketi Miliona lea e tau avatu. Ou te pese pea, pese pea, fai lau pamoia, fafaga au moa e 1,000, 3 au moa e ai i le aso. That's o le faatulagana lena, 52 au povi, ia ia lau povi i vaiaso uma. Ia

faatulaga atu ai au mamoe ae la e fafaga i ou lava lima. Lava meaaano, lava ma mealelei. Ia ona le pine lea ma taumafa lau molisaina, taumafa lau avoka, taumafa lau esi, lau isaraelu ma lau aikupito, ia faapena ona maua le soifua maloloina.

O le faamanatu atu lena, ae faafetai mo le sui usufono mo le faamalamalamaina mai.

FOFOGA FETALAI: Malo, faafetai, manaia foi le faasoa o le Minisita i fuafuaga alualu mamao ina ia tau foia ai lava mataupu na laga e le sui usufono mamalu.

Ia tulai mai lau afioga i le sui usufono mamalu e faaauau lau saunoaga.

Afioga FUAAVA SULUIMALO AMATAGA: Ia faafetai, ia e momoli atu le agaga faafetai i le afioga i le Minisita i le faaopoopo mai e pei o le tulaga na avatu iai se faamatalaga. Ae o le tulaga lea e pei ona saunoa le Minisita, e pei o si mea lea e vaai atu ai i i, ia ona o lea ou te tusiina ai le GMO. O le mea foi lea o le Genetically Modified Organisms ea po o le... ia e tele ia o ituaiga laau taumafa mata aemaise foi o manifasi e faaoga mea foi ia lea e vave ai ona tutupu, mamafa...

O le agaga uma o nei mea uma, e fai e faatoaga i fafo, ia tele le tupe, masa production. O le mea lena ou te fai atu ai a fofoa nei moa e pei e 2 masina ae ua toe fasi ina ia tele. Ia ae e iai nai mea na e tatui ai i totonu, ia vave ai ona... ae o lea o lo o iai foi ia faalapopotoga i totonu o si o tatou atunuu, o lenei lava e pepese ma taumafai le tatou organic. O lea lava e ola lava... a outou vaai foi i le tatou lava moa ia e fafaga, e seasea lava e vaai i se moa o taumalua mai foi lea i se tino. Ia ae e te vaai atu foi, a oo foi ina fai, e tau maua iai tatou le tama fefeu. Ia o le tama lena ua ova tausaga.

Ae o le manaia ia o le meat foi lea e seasea e tau aveese ni gao, e na o le augagase lava. Organic la o lea e taumafai mai ai ia nai faalapopotoga ia, ia la foi e aua le faaogaina le vailaau fagavao. O lea sa ou pese atu ai foi i le isi tatou Fonotaga e inu foi e le kukama pe a fana i le vailaau fagavao. Ia e sasala atu lava lau kukama e ai, ia ae la e iai si fasi vailaau ga, ia e laititi lava si mataua, ae ou te iloa e oo atu i le 5 tausaga ua e faamama toto. Ae e pei o nai mea uma na foi lea e tatou te autilotilo iai. Ia aua ana faapea e vave fai nei mea ma o tatou agai i le organic, ia e pei ona malie ai le saunoaga a le afioga i le Minisita o lou uso a Minisita o Faatoaga, semeamanu e faapenei e le faapenei lou tino.

Ia ae o le tulaga na lea foi e taumafai atu ai, e le iloa pe o meaai mai fafo, ae o lea o le a taumafai ia tatou lava faaeleeleaga i totonu o Samoa, ia ae aua foi e tatou te lauina mai foi vailaau e fai ai. Ia ua leai lava se eseesega ma fafo, ia ma tulaga foi lea ia fai foi i inei, ia ae ia tau more organic foi lea le faiga, ia tatou lafupovi, lafupuaa, lafumoa ma tulaga uma faapena.

Ia o le tulaga e pei ona aumai, e pau si mea lea ua siisii i luga lea mai i le 36 i le isi Tausaga Faaletupe 2018/2019, 36 tagata fou ua toe o i totonu o le tatou facility lea faamama toto, sii lea i luga ma i le 48 a 36 /48 lona uiga a oo atu i le tausaga a ou fita atu i ai poo se mea o le 30% le siitaga uiga pe sau le lipoti o le isi tausaga ua oo i le 60 sau le isi tausaga toetititi 80. O lona uiga o lea a siisii lea la avatu ai sa matou tuualalo mai Aleipata Itupa i Luga, tatou taumafai lava tatou o i le prevention, puipuia aua a fai o lea ua saunoa le Afioga i le Minisita lea ua sau le 30 masini fou toe saunoa foi le Minisita i lea tausaga lea ua 50 masini fou o lea a tatou te o a tatou te reacting tatou te o foi lele na o le togafiti a, ae tatou mei i le isi laasaga tatou o e taumafai e tulei le prevention. Ia tatou more proactive e fai tulaga ia e mafua mai se faamatalaga ona o le 2004 na matou o ai matou le task team o le faatuina o le tatou Falemai lea 2005 ao Minisita le Afioga ia Mulitalo sa matou iai ma le Ofisa o le Loia Sili aemaise foi le Faalapotopotoga i sina board i le tau faiga o le study ina ia aumai ituaiga masini tele o Falemai i Sigapa e iai uma a latou ao le mea a lea taumafai le vaega e tulei o le faamalositino , o taumafa , ma me a faapena foi lea paleni ia ma le tulaga foi lea ia more friendly le enviroment lea e iai le tagata i totonu o le falemai ina ia e alu atu e faamama lou toto e te vaai atu i TV ma meauma faitau tusi e pei a e te leo mai e te leo faia se togafitiga. E pei o lae te taotooto i lou maota i lou potu moe ma faifai aua o le tele o tagata foi e o atu a latou sulu latou masini. O le tulaga la lona na matauina i falemai ia e pei a si mea ia e pei foi la iai le agaga e taumafai atu i le tulaga lea ia more on the prevention ma le agaga faaaloalo. O se faamatalaga lea e tuuina atu mo le faafofogaaga lau Afioga i le Fofoga Fetalai aemaise le tatou Fonousu i lenei taeao. Faafetai.

FOFOGA FETALAI: Malo faafetai saunoa i le sui usufono mamalu ona o le taua tele o lenei foi Faalapotopotoga. Ua saausi ai lava le tele o saunoaga a le paia o le maota aemaise foi o le faasoa a le tatou faigamalo aua lava le puipuiga foi ma le agai i luma o lenei Faalapotopotoga. Ona o le mea lea ua tatou oo mai i le tatou taimi malolo, o le a faauau tualumaga o lenei lava lipoti i le aso a taeao pe a toe taliu mai, ona o le taua foi o le lipoti a le Faalapotopotoga o Fatugao i totonu o le tatou atunuu. O loo iai le faasilasilaga a le Failautusi, o le aso 23 o Mati o le a faatino ai le siaki faasoifua maloloina a le afaigaluega a le tatou Ofisa o le Fono Faitulafono, e faatino e le Faalapotopotoga lea o Fatugao o lea ua faasilasila atu. A o i ai se sui usufono e moomia se siaki o loo avanoa le aso 23 o Mati e faatino ai lea fuafuaaga taua a le Failatusi ma le Ofisa o le Fono Aoa mo a outou Afioga i sui mamalu.

Talu ai ona o lea ua tatou oo mai i le tatou taimi manava mo le aso fono lenei e iai le manatu tatou sailiili malosi mo taeao a toe maua foi nisi avanoa e faauau ai la tatou galuega, faamalo le usufono i lenei aso faafetai mo le

tofa tatala e soalauopule ai le mataupu mo le manuia o le atunuu tapuai mai, malo le faatoatoa malo foi le faapalepale viia le Alii i lona potu faasoa mai ua tau manuia ai le alofaiva o le tatou Palemene lenei aso. Faafetai atu i Afioga i Taitaifono ma sui usufono a tatou Komiti mo le tapenaina o Lipoti e pei ona felafolafoai usugafono a le tatou atunuu faafetai atu foi i Afioga i Minisita ma le tatou Malo mo Tali a le Malo i fautuaga a le Komiti ua faafofoga le tatou Maota ma le atunuu, i le faamalamalamaina o mataupu sa laga i tatou felafolafoaiga. Ia malo faafetai tapena, talo soifua ia le aso a taeao ile alofa o le Atua momoli atu ai lo outou soifua e faauau ai lo tatou galuega o totoe.

E momoli atu foi le faamalo ma le faafetai i Ofisa Sili o Pulega o Matagaluega ma Faalapotopotoga Tumaoti a le tatou Malo, malo le onosai malo le lagolagoina o galuega le Palemene oa ni galuega o faatali mai i lenei aso ia agalelei le Atua.

Avea foi lenei avanoa e faatalofa atu ai ia Pastor Taeauga Ropati ma le Faletua o lo o matauina o lea lava te lua taputapu mai aua lava le Fonousu a le Palemene. O le mea lea malo faafetai i lau Susuga i le Faifeau Faafeagaiga ma lou Faletua mai Melepone i Ausetalia, Faalapotopotoga a le Atua i Samoa AOG. Malo faafetai, faafetai mo le tapuaiga, faafetai foi mo tatalo a o feagai ai le Palemene ma ana galuega fai.

E momoli le faafetai i le tapuaiga a le atunuu e afua mai ona ao seia oo i fanau iti i ou paia faale-Malo, paia faale-Talalelei ma ou mamalu faaleaganuu, malo faafetai tapuai, e manuia lava le usugafono a le Palemene ona o lau tatalo ma lau tapuaiga.

Pe afai ua i ai se gagana a lau Palemene ua sala i lenei aso e matou te faamalulu atu. O upu e masani ai, afai ua sala tai ia tonu uta, ala ia i tua e pei o le upu i lea itulagi se faaletonu o le Palemene. Agalelei le Atua i tiute o totoe i lenei aso ma ia maua pea lona filemu i aiga uma o si tatou atunuu. E faamalo atu foi i le Susuga i le Faafeagaiga ma le faletua aemaise foi nisi o tupu o le atunuu o loo tapuai i le fonotaga a le Palemene, i totonu o lenei maota ma faafeagaiga o taputapu mai. Malo tapuai faafetai le fai o le faiva. O le tatalo a le Palemene, ia agalelei le Atua i lo outou valaauina, faafetai atu foi i auaunaga o loo tautua pea mo le puipuiga o le saogalemu o le Palemene i taimi o ana taulumaga, Pulega o Auaunaga o Tineimu ma Faalavelave Faafuasei, Matagaluega o Leoleo ma Falepuipui Matagaluega o Fesootaiga ma Faamatalaga Tekonolosi 2AP, Kampani a le Cooline. Pe a o tatou tatala lenei aso ia tuliloaina lo outou afifio atu i le mana o le toto o Keriso, momoli filemu atu lo outou soifua i Ofisa o Aiga ma Itumalo tapuai mai.

Ae tatou te le i tolopo ou te talosaga atu i lau Afioga i le sui usufono mo Lefaga ma Faleseela sei saunia se tatou tatalo e faai ai la tatou fonu.

Na tolopo Taulumaga a le Fono Aoaio i le itula e 1:10 i le aoauli, seia aulia le itula e 9:30 i le taeao o le Aso Lua, 14 Mati 2023.